

余山集再續集

金山續集

皖桐方文爾止著

壻繡水王槩安節訂

五言今體

泊西梁山有懷舊游

以下壬寅年

江北多奇士無如戴敬夫詞源通屈賈書法擅歐虞家
與天門近身隨國運徂平生交不淺感動獨長吁
故人魯孺發早歲隱天門一命去荆楚終身懷國恩專
征曾秉鉞垂死復歸園澤畔行吟處重過欲斷冤

送張脩令歸永城

青溪有水閣亂後與人居欲售今無主爲時昔不如新
秋思故國逆旅剩殘書漪上田園好君歸且荷鋤
清江訪徐月鹿水部

曾有西陵約來時歲已更荷君猶解佩歸客正逢兵彈
指三年別懷人百感生那知公路浦又傷使星明
舍弟辭家久相依官舍中稱詩歸藻鑑把酒慰飄蓬老
我仍狂態因君多古風寒花傲霜雪不與衆芳同

贈嚴水子胡雪漁

歷下交游少客中愁思多何期逢二妙無日不相過釀
酒惟杭米

北方造酒皆黍
雪漁家獨以秫

烹泉得茗柯醉醒醒復醉夜

夜共婆娑

嚴老丹青聖胡郎篆隸工勝情俱不朽逸興況能同踏
雪舜祠外觀魚藻水中殊方有知己且勿歎途窮

贈魏竟甫使君

君去川南日人皆惜遠離淵懷獨恬曠棧道失艱危竟

展文翁化爭傳幼婦詞三年果遷擢又得奉光儀
猶記彭城署西偏馴鶴亭遶堦芳艸碧當戶遠山青退
食開書卷閒吟倒酒餅九皋相唱和父子並仙靈
河上黃樓廢巍然復舊觀濁流無泛溢山郭獲平安古
賦二蘇在新碑萬姓看鄒生曾授簡功蹟表城端
孟夏聞君信懸知八月來灤源頻悵望珂里却徘徊雪
後驅車至樽前笑口開明朝吾欲別那得久追陪

初度

以下癸卯年作

五十又加二頽然成老翁髮因愁半白顏借酒微紅米
帛新年少畊桑舊業空生來骨相薄不獨坐詩窮

沈方鄴同王山史杜蒼畧黃俞邵諸子集報恩寺

分韻兼送其歸宛

去家三百里除夕不曾歸君意翛然得世人知者稀寓
移城外寺客滿竹間扉春甕多名酒流連至落暉
節候近寒食能無上塚思買書從白下挂席過黃池好
友難爲別輕杯且暫持高秋重命駕拚醉桂花時

題畫爲田雪崖司理壽

自公來白下甘雨被郊圻雞犬晝長靜牛羊夜不歸遠
山青歷歷新柳綠依依況有吹笙客閒時一欵扉

謂山史

丹徒曉發與吳襄宗同舟

京口又開船船人報好天潮生穀雨後風緊麥秋前爲
客何時了論交此地偏且聽吳季子與廢話當年

武進訪岳聲國有贈

城南新卜宅密竹隱花關三逕艸長綠雙親鬢未斑鼎

烹猶待仕杯水且怡顏況復神仙侶晨昏足往還

常熟訪錢遵王雨中畱飲

高齋空聽雨不必待嘉招梧柳落空翠軒楹排古密試
茶塵盞洗勸酒旅愁消似坐千峯麓寧惟遠市囂

君家東礪老屢日共婆娑

牧齋先生自號東礪老人

羣從有才子新

詩亦和歌祇應長聚此無奈欲歸何既醉猶餘酒來朝
許再過

毘陵遇潘蜀藻一宿而別

思君頻入夢此地忽相逢艤棹沽村酒挑鐙聽梵鐘青
溪有三徑明月待孤筇何處居停好惟應定鷺峯

老覺

老覺光陰速偏于夏日長平明先翼晚向晦不生涼看

曆喜秋近開車憂歲荒幾時霖雨降甘澤沛池塘

白下

白下知交少貧居况又偏從無問字酒那有作碑錢生計仰爲客詩人與作緣經營惟一飽蕭灑送餘年

猛雨

猛雨驅殘暑涼風送早秋閉門猶謝客乘興獨登樓芳樹葉遲落平川水漫流晚來天氣好步履出城游

雨後

雨後閒無事溪橋試一憑夕陽晴始穩秋水漲偏澄東圃行看菊西園又訪僧暮歸筋力倦把酒對青燈

獨坐

獨坐溪秋夜淒涼百感生夢熊猶未卜買犢尚無成缺

陷人間事蒼茫身後名放懷惟有酒高咏雜蟲聲

真州

真州六十里北去向蕪城過客憑昏黑舟人慣夜行擁
衾纔一覺泊岸甫三更津路皆如此何愁風浪驚

石塔寺懷僧介立

城南石塔寺曾寓六年前夙好僧何在重來客黯然經
房塵暗積講席月一作字空縣獨有江行艸虞山爲爾傳

牧齋先生吾炙集選介立江行艸數十首極推之

秋霖

江漲已如此秋霖更奈何小園成巨浸窮巷起層波旬
日居難出比鄰客不過祗應與童子赤腳弄漁蓑
溪水高于閘溝塍何處消千家圩稻熟一夜浪花飄雜

大棲無地魚龍氣甚驕潮痕纔稍退雨過又生潮
買宅清溪上柴扉喜向南曾栽數叢竹又種幾株柑不
意今秋澇都將衆樹淹音庵惟餘楊柳活黃葉亦甦甦
貧家元寂寞況復雨經旬縱有餅中粟應無竈下薪減
餐聊過日半閣且容身只是牆皆倒重修却苦人

十月十九日爲邵陽王幼華初度孫豹人房興公
吳賓賢郝羽吉汪舟次咸集其寓子後至因贈

二詩

古寺訪詩人偏逢初度辰相知何必舊至樂莫如新風
雅客先集疎狂意自親因之借杯酒爲爾壽千春
屈指關中友王郎獨少年科名方藉甚風骨更翛然一
見遽相洽三生或有緣那堪淮水駛明日又開船

自王家營至濟寧雜詠

遠游當歲暮初意覓舟師雪冷愁河凍霜晴策蹇馳道
途因老熟筋力較前衰向晚投村店吟身分外疲
老人宜晏起况是苦寒天此日趨前路中宵不暇眠雞
鳴星鬢下驢秣土牀邊蹊徑尚昏黑征夫已著鞭
漸入古滕薛當時亦附庸却疑方域小難稱子男封岱
色望非遠鳬山歷幾重路旁盤古廟欲訪未從容
羸畏高難御驟欺小易乘那知性蹄齧亦復效奔騰觸
石驟傷脇墮崖幾折肱開春理歸櫂一水至金陵

癸卯除夕定陶署中寫懷六首並呈正誼明府

野性貪爲客尋常不憶家驚心惟令節對酒亦長嗟五
十人稱艾風塵鬢已華明年除夕起勿復滯天涯

回思十年內四歲客中除淮水棲荒寺丙申冬寓淮燕之放生池

山跨蹇驢丁酉歲抄都門移寓蕭灘纔艤櫂辛丑除夕之始抵臨江荷澤又

停車癸卯十二月似較前番好言歸總不如

故人投我轄官舍頗優游肉食多麋兔陶產麋兔最多山珍足

柿榴曹州出鏡餅崗榴列朝詩覆閱在署三十日重閱列朝詩選一遍六法字

冥搜子著字學蒙求一書卒業于此只是訟庭簡將何具麥舟

石城雖卜築終不喜城中山莫妙雙闕牛首山名天關田恩買

十弓荷鋤良足樂懿畝况能同只在明年定從茲息轉

篷

岱廟曾占夢熊熙在巳年懸弧應有日降嶽且由天壬寅

冬予登岱祈夢兆在乙巳婦孺甘蔬水香燈禮竺乾今宵懷抱裏幼

女可人憐

年年當此夕俯仰獨含悽老覺憂端少心知物理齊
忍冬藤不死盍旦鳥猶啼瞬息春回轉東風花滿谿

月下飲王左車

以下甲辰年作

維舟當落日登岼訪幽人巷僻風塵少庭寬月色新
舉家修淨業藏酒待嘉賓感此流連意歸時想結鄰

大日
子之

吳興

夜泊毘陵

客路偏逢雨維舟夜已殘江城千戶閉野店一燈寒
酒薄沾猶易愁多掃却難昔年偕隱處重話鼻辛酸

贈劉爾符明府

何事烏程縣棲遲十載餘罷官無長去聲物樂水且閒居
豈是歸途遠惟應生計疎當時諸父老猶餉米兼魚

崑山續集

卷三五言集

一

城西鐵佛寺鄰並有空園盡室家于此非僧莫與言
接梅行雪澗淪茗訪泉源却笑分符者朝昏俗務繁
風昔鄙章句將詩寫性情三唐無定格五字果長城
看我吟髭白逢君老眼明但閒來共語知不吝資器
長春宮柳暗此邑富豪賢舊識李翁好新懽劉子偏高
文渠獨絕芳詠爾尤妍茗雪雖名勝難如華岳蓮
長春宮在陝州朝邑縣劉卽朝邑人李叔則先生亦同邑故云

蟬

僧窗淡樹裏終日有蟬鳴不似陰蟲語能爲高詠聲
晚來常靜默秋至轉淒清何物螳螂者偏懷害汝情

蚊

水鄉多白鳥欺我絳帷穿自解乘虛入何曾待客眠
扇

驅還聚集衾覆亦鑽研惟有火攻法雖慈不汝憐

長興道中

殘暑亦何酷溪行晝不能晚天呼小艇昏黑源長興信
有空囊溢知無暴客乘惱人惟一事白鳥太侵陵

吳江訪顧茂倫卽別

秋水魚梁路孤舟柳外維欲尋窮巷去夙與故人期會
面何匆遽消覓是別離安能似京口杖履日相隨

京口道中

江行秋色好風浪却愁予不敢催蘭櫂從茲稅筭輿平
安登岸後懽喜到家初童僕將行李扁舟穩自如

過鍾山下

鍾山千萬樹底事一朝無斬伐霜根盡淒涼玉殿孤何

人薦蘋藻牧馬任兵徒猶有遺黎在吞聲泣向隅

八月十二日自茗歸

在家思作客作客又思家
去日黃梅雨歸時紅蓼花
細君藏臘酒嬌女進秋瓜
夜夜高樓上團圓看月華

偶集成語二句爲門聯曰
眞作野人居請迴俗士
駕復係以詩

茅舍鷺峯北柴門烏巷西
栽花數十本種菜兩三畦
山月迎窗出江雲入戶低
誰知城市裏吾自有幽棲
鄙性好交結往來人亦多
却無俗士駕曾向小園過
三徑堆黃葉雙溪冷白波
祇應風雅客相見共婆娑

李閔翁寓市隱園招同黃子威陳俞公小集

名園久寂寞今日始聞歌
一老池邊立羣公雨後過
秋

花臨水艷古樹閱人多屈指金陵勝無如此澗阿

九日周雪客招飲觀劇

九日渾無賴三年不在家南州使君署

辛丑游南昌東周伯衡招飲

省故人衙

壬寅游濟南李漑林招飲

又作蕪城客

癸卯游揚州王貽上招飲誰看

籬落花今秋才返舍采掇復何嗟

正擬登山去周郎復見招懽娛過此節歌管遂終宵閒
却籬邊菊空餘花下瓢老妻私嘆息寂寞又今朝

雪後偕杜湘艸宿烏龍潭卽事四首

淒清潭上路不到十餘年恨我移居遠輸君發興偏欲

援山水窟忘却雪霜天小塞衝泥濘新晴意豁然

龍潭絕勝地別墅有丁何

苗生德坤

疇昔往來熟如今感嘆

多圖書皆散失樓閣亦消磨落落幾家在詞人無復過

唐翁七十二之宜奉佛起高樓一自幡幢去空餘菡萏秋

屠沽紛入室唐佛閣今為屠兒所據鄰里亦生愁況爾傳經者湘草

為唐門下士裴回涕泗流

韓子曾居此秋聖徐生亦寓茲道潔我來常信宿世變各分

離奄忽歸黃土衰殘剩白髭還將數行淚一灑舊荷池

歲暮哭友

數年以來亡友日多然未有若今歲之甚者殘

冬蕭瑟感念殊潸人哭一首

錢牧齋宗伯

八十三齡叟何勞淚滿襟獨憐投分晚頗覺受知深筆

札猶盈笥聲詩最賞音許為吾集序醞釀轉浮湛先生云應

酬之文俄頃可就若序君集必醞釀半年始成今已矣

康小范孝廉

金陵流寓好一旦別予歸博物能知命還山且息機范小

精于五星自言今歲有災故急歸里凶星終不免稚子欲何依只有經生

業年年閔禮闈屢科會試卷俱擬元以小疵輒罷

胡彥遠高士

詩文既蒼秀書法更無倫曾爲子題冊藏之果異珍素

械春尚寄良友意偏親物化同尸解前知易簣晨彥遠病中

預知死期是日邀山中舊衲及諸親友談笑而別

范麋生太學

富而好禮者宣聖以爲難之子真豪俠揮金若羽翰盛

年誰料死逆旅更淒寒執友逾千里驚聞摧肺肝

鄭掌和太學

若翁蒙難後門戶費撐持老不善生息貧翻甚昔時才
華雖有異口過亦難辭近日江南北爭傳戲謔詩

笠山師枉駕草堂奉贈二首

以下乙巳年作

結制依香刹三冬獨閉門蚤春纔一出徐步向孤村義
學吾無解詩篇且共論荒廚有蔬笋隨意撰盤飧
鄙性不諧俗偏多物外交况師同里閑特地訪衡茅日
暮難畱客春晴再出郊萬松菴最好欲借一枝巢

靜鑑上人招同文及先湯岳夫龔半千王左車安
節諸子爲謝公墩之游淹畱竟日賦此

寒食家家雨登山期屢更春晴纔一往詩侶况同行入
室蘭英馥克庖菌味清先鐘發溪省悅惚記前生
主人真靜者書畫亦通禪葺屋藏丘壑爲屏學水田昔

賢遺墨聚我輩賞心偏白壁爭畱句他時賴爾傳
謝傳圍碁處嘉名今尚稱古松誰翦伐新塚忽憑陵世
事都如此山阿慨不勝獨疑煙樹裏猶有六朝僧
大雅久零落良朋甚寂寥惟餘數人在又惜所居遙雅
集歸蘭若春光遍柳條莫愁湖上月重訂不須招

王左車四十初度

壽母神明王佳兒著作新君年方不惑奇福果無倫夙
世應禪客全家悟佛因何須慕鐘鼎葵菽自千春

左車母夫

人年七十餘長子安節詩書並妙舉家胎齋亦奇事也

初度懶迎客先期去蔣山欲將功德水一浣道人顏禮
塔欽真覺餐芝抵大還獨憐弓劍地絕頂未能攀

是日左車

避客靈谷寺寺有八功德水寶誌公塔誌公封真覺禪師

我亦思靈谷山門不見松今朝君在此介壽合相從興
阻谿邊雨心馳雲外峰天晴仍出郭徐步躡芳蹤

午日泛舟

喧喧桃葉渡鐙舫聚其間城闕分今古笙歌尚往還少
年誰解恨故老獨悽顏把酒不成醉停杯望蔣山

哭葉御濤廣文

獻歲華陽去歸時必造予暫離猶不舍永別意何如官
小同雲水兒才大里閭獨憐詞賦手著作未成書

寶華山訪見月師

亂山回合處中有律師存授戒不期悟勤修豈待言先
朝銅作殿終古法爲門古刹多荒落惟茲報佛恩

揚州訪孫豹人汪舟次卽飲舟次宅令兄左巖季

舟續至

江關纔繫艇先訪故人家董子祠邊柳

柳人居柳巷

園

公巷裏花

舟次居花園巷

相逢那忍別有酒不須賒坐待炎曦

匿歸林數暮鴉

重陰覆庭院終日閉烟蘿不許纖塵入惟聞二仲過弟

兄風雅並山水唱酬多雨後期同載芳洲采芰荷

雨夜同弟人宿舟次館

連朝頻接席今夜復同牀雨漬琴書潤風生枕簟涼肥

軀妨並寢鉅息撼鄰牆曉起窺明鏡先秋髻已霜

期劉黎先游蔣山

十載鍾山下山陵恨未登白頭宮監在碧瓦護持能聞

爾舊相識吾徒得所憑秋晴期一往策蹇意飛騰

夙有尋山癖其如儔侶無劉生爲我導王子亦同驅石
上冬青樹門前白項烏豫知登眺日懷袖欲沾濡

吳平露四十初度

昔出盧龍塞逢君旅舍中言詩懷抱合把酒詠歌同浪
跡隨牛馬離情闕雁鴻誰知七年後重晤冶城東
居停亦未遠晨夕得相過問法尋山寺揆泉人澗阿交
唯詞客好錢付酒家多况是稱觴日歡呼更若何
君才似鸞雀六翮久應飛豈謂登強仕猶然困布衣簪
纓今不重瓢笠未全非吾慕嚴陵老滄江且釣磯
獻歲將歸去山陰道上行護庭旣愉悅蘭砌復崢嶸卽
此已遐福還期著大名慙予過半百詩外一無成

歲暮哭友五首

附哭弟一首

林茂之國老

昔際休明代今逢喪亂年天生真處士人望若神仙好
我情何篤臨終語可憐遺詩將萬首精選自應傳

梁公秋兵部

射陽流寓久家世本燕畿感憤緣何事蹉跎竟不歸
心成痼疾直道是危機猶記淮南夜相持淚滿衣

陳士業徵君

去冬君物故今夏始聞知相去路千里無由寄一詞
高樓長在念上壽復何悲獨惜古文手西江繼者誰

梅杓司隱君

多病緣多慾吾嘗爲爾箴君言生此日速死是初心
向子識誠卓陶公恨轉深響山遺集在終古有知音

陳簡菴貢士

相思逾廿載濟上始相逢負俗吾同調工書人所宗近
來多橫逆老去不從容撒手辭塵世青天騎白龍

從弟退谷文學

同堂兄弟九爾我最情親野性不諧俗詩才果絕塵盛
年名始大逆旅死何因痛殺黃河畔同牀話到晨

王涓來侍講書至

以下兩年年作

正欲寄君書君書忽寄予平生一知己契濶九年餘大
海萍難遇寒江棹又虛重尋期楚澤或恐是冬初

吳超士見訪同至雨花臺小飲而別

三十年前友睽違二十年江城重見訪涕淚各潸然老
景貧相似靈巖隱獨偏看君髯髯黑絕勝我華顛

愁殺新正雨。忻逢晦日晴。故人何忍別。攜手一同行。出郭沽春酒。登臺望帝京。河山增百感。豈直爲離情。

燕子磯阻風

早春多雨雪。二月始微晴。及此扁舟去。仍無百里程。雲垂江岸黑。風起客心驚。野泊依漁港。磯頭不可行。少年輕遠涉。全不畏風波。老大方知慎。艱危歷已多。從人笑迂濶。曷敢恨蹉跎。杖策登山頂。臨風一浩歌。

同諸君游竹林寺歸至霍林寺飲米元章墓栢下。夾山餘古剎。三徑是新開。騎馬入空翠。登樓絕點埃。故人將遠別。歸路且遲徊。海嶽今何在。墳前醉一杯。

題華龍脣新居

春草名堂久。今春堂始真。

華舊刻春草堂詩

地偏疑澗戶。客到

總詩人投轄元多酒張筵不似貧秋山桂花發先報白頭親

羅公倬招同長益豹人其年諸子小集有贈

淳安解組後白首臥江村

羅曾為淳安令

城市不輕入交游誰

與言冲懷慕詞客設酒借鄰軒此意真風雅何辭步履煩

二月訪君寓牀頭傾一瓢鶯花過寒食魚笋又嘉招滿眼皆兵革回心向寂寥將無任處士假托避徵輶

羅病後遂

致書言故云

將去潤州別孫豹人

二月來京口行舟未擬停逢君高興發踏遍衆山青忽春將暮蕭蕭鬢已星無何又分手身世總浮萍

夏寒

朱夏寒如此皆云時令愆老夫仍衣袷布被復裝棉前
苦亢暘甚今愁陰雨偏誰爲龜鑑者厄在丙丁年

宋人
柴望

以丙午丁未
爲古今厄運

雨中

潤州歸未久又欲去蕪城長夏偏多雨經旬不冒晴水
從萍沼漫魚向槿籬行莫遣兒童捕貧家畚自生

晝寢

老人多好睡夏日更相宜飯飽脾應倦神昏眼自垂手
中書墮地窗外雨侵肌信有羲皇樂陶公不我欺

夜步

茅宇夜初靜瓜疇人獨行雨涼無六月露濕已三更寂

寬悲身世迢遙念友生仰觀箕與斗天亦尚虛名

寄壽嚴顯亭母夫人七十

登堂曾拜母二十四年前眼見縫衣日心知剉薦賢
閨門元禮法烟火亦神仙豈必兒孫貴方令彤管傳
昔從邊塞返大諫送予詩念舊亦何篤徵言曷敢辭
獨憐延頸處不及介眉時明歲來湖上當筵補一卮

夜集汪舟次齋頭有贈

南邨讀書處萬事不聞喧因我來江國入城期晤言
茶瓜香滿室梧竹影遮園但覺情人好焉知暑氣煩
風帆去江介省試入南都雖不藉科目養親安可無
經綸酬壯志潤澤及潛夫三十已遲暮乘時勿再需

七夕立秋

時寓水月菴

夏末苦炎蒸衰年更不勝忽逢江岸雨疑濯玉壺冰此
夕天何曠方秋氣已澄香林無所事茗粥對山僧

中秋前二日龔孝緒招集稻香樓

江城百戰後臺榭總凋殘獨爾建高閣令人懷古懽客
隨微雨至衣似暮秋寒賴有纖纖手傳杯夜未闌

生在

有妓若西

中秋日龔公芝麓復集稻香樓

日日醉君家聽歌與看花可憐明月夜卻被片雲遮移
酒出山郭張鐙就水涯同舟并仙侶應不羨浮查

袁穉菴寓中小飲限韻

君年將大耄渾不似頽齡笑語發天籟歌詞見典型客
中羣彥集露下一鐙熒屈指平生友真同欲曙星

秦虞桓招同諸公集潭影堂限韻

爛醉螺園後重來二十秋死生成契濶仕宦亦湛浮

疏舊有螺園子與虞桓燕友痛飲于此今石疏久沒燕友官銀室故云獨爾開芳徑相逢

歎白頭霏霏池上柳似欲助人愁

板扉淡巷裏世事不曾聞高樹團秋靄空庭卷暮雲尊
疊長在眼耆舊自爲羣好我頻來此那堪手又分

李二則職方招同兄子洞羞廣文夜集

君自越東歸巢湖隱釣磯雖無城裏宅難與故人違雪
酒開秋甕山廚動夕扉廿年爲別久握手尚依依
羣從強爲官元非意所懽持盃懷往事拊几發長歎老
去同心少憂來欲語難今宵無忌諱傾倒一鐙殘

答李述蓮見贈

邗江風雪夜攜酒送子歸詩向鐙前出書從別後稀年
衰重會面邨遠未開扉豈必勞雞黍高吟慰渴饑

巢縣卽事

小邑巢湖畔無關忽有關捉船官藉口抽稅客淒顏野
艇空畱滯行人斷往還始知爲政者絕勝虎斑斑

和州贈林孝艸

蚤歲上公車猶然茅舍居對門營小圃鍵戶讀羣書芳
徑少來客沖懷獨昵予秋窗談古字杯酒不教虛

贈馬堯都

輦下匆匆別重逢逾八年論交敦古義把酒話霜天又
欲之燕市先期過濟川堯都與從子
蛟峰同年去秋鴻雁影回首

各悽然

舍弟退谷以
去秋卒和州

贈苟與適

君年才半百有五丈夫兒福是人間少家從江上移層樓供遠眺朋酒待佳期卻笑陶徵士茅檐白髮垂

陶公晚年

始生五子而家又貧有白髮被兩髻之句

贈葉鳧仲

論交君最久三十又三年水閣青谿上山窗翠竹邊昔游無一在二老尚依然況有園亭好霜林合醉眠

贈林斯遠

寥落江鄉客黃花何處尋城西有芳逕意外得諸林滿院堆秋色言詩愜素心忽忽爲貰酒但覺爾情深

訪楊惺一先生邨居

高人棲隱處其地曰孤洲訪舊不辭遠論心無限愁世

情爭野馬吾道狎江鷗
可借牆東宅從茲罷遠游

飲夏又新山莊同李二則孫曼倩

邨居不遠城邀客趁冬晴
孤閣當門迴千峰入望明
晚田多釀酒少婦解調羹
只此堪終隱何爲薊北行

夏方歲

貢人京

歷陽道中送龔司寇

告假僅三月歸期已過三
還朝須叱馭江路勿停驂
台鼎望誠重林泉味亦甘
倩子謀綠野當在石城南

過張于湖讀書處因懷張文昌

古郡求前哲人知有二張
于湖碑尚在司業墓全荒
俗眼矜科目于湖宋狀元吾徒頌樂章文昌樂府最妙城中多隙地祠

祀曷能忘

襄城伯李公墓上作

被步西郊外襄城有舊碑公侯何足貴節義始為奇死
在崇禎日賢于永樂時松楸尚無恙偏惜向南枝

周侯廟

侯諱虎臨淮人宋末為和令距元末四十萬眾而保其城謝得輿有文記之刻于廟

欲謁周侯廟先觀謝令文孤城經血戰雙碣表奇勛歲
久隳垣壞秋深葭莢紛荒殘費修葺其責在諸君戴無

醉金修廟意故云

鎮淮樓

臨去和陽日方知上此樓高吟懷

太祖

御製文集有鎮淮樓絕句

遠望情神州采石當年事烏江萬古愁朔風吹正急誰

作濟川舟

答曇影上人

古寺近城西寒鴉日夜啼此時愁作客幸與爾同棲待
月常沽酒看雲或杖藜那堪吾又別江艸正淒迷

送李武曾之上谷

匹馬游燕薊西行更出關故人官上谷名嶽禮恒山弔
古多吟興衝寒恃壯顏邊城爲客苦秋盡亦須還

畱別項嶠雪

感君多古誼畱我過殘年良友誠難別窮途豈易延雁
鴻謀飲啄霜雪去湖天後會知何日言之意愴然

天寧寺贈涵蒼上人

寺從前代寓軒爲老僧題三十六年後重來路不迷緇
流公尚健白髮我含悽借問當年字猶懸丈室西

歲暮哭友五首

潘江如處士

君病臥荒村三春瘡不言我來難命駕詩去已傷魂霜
月聞凶信淒風哭寢門平生師友義痛絕向誰論

劉輿父貢士

新從燕代返右臂患風淫只道體猶壯那知病已深受
官非得已抒憤有孤吟不讀梅根集誰能諒爾心

崔正誼戶部

昔汎淳湖櫂逢君結古懽分金渾不惜知己最爲難正
擬山濤貴能祛范叔寒如何歸冥漠延望獨悲酸

余中台兵部

大雪來洛水欣然贈我袍中宵共鐙燭私語發牢騷
俗爲王猛存心實謝翱可憐松柏志寂寞委蓬蒿

盛茂開山人

山人以畫名家其子伯含林玉尤妙而早世

八十五齡叟闔棺何用悲所嗟雙玉樹未及早秋萎老
筆流傳在高風繼起誰他年修志者名與仲交垂

丁未初度

以下丁未年作

五十又加六居然成老翁身猶無子息壽已過先公

先司

農終于五十五

短髯何辭白餘生不諱窮祇應勤著述懷抱古

人同

贈葉伯如

陋巷訪君廬蕭然一榻書妻賢猶釀酒客到每烹魚自
是雲霄器寧甘巖穴居江東有故舊今且曳長裾

贈李望之

舊寓園亭好新遷宅舍寬對門桑滿野畱客非盈盤寄

託有詩卷生涯只釣竿乘軒非不貴世路日巔岼

贈戴季默

季布重然諾風期海內聞浮家來潯水把釣狎鷗羣蓬
梗偏憐我壺餐每累君久淹無意緒歸櫂及春分

王無異書來却寄

君去華山陰三年勞我心誰傳芳信至意與春谿浚尚
有白門興重聞黃鳥音掃花人未老回首一沾襟

陵時有所狎作
掃花圖以歸

石埭道中

谿行三百里節節是危灘水急黃河似山滾白晝寒逆
流何足恨延眺且爲懽想到陵陽麓雲峰更好看

姚六康明府署中同李雲田姜鐵夫夜坐各賦三

詩

美人爲政處秋浦萬山中種秫家家雨栽花樹樹風官
閒無訟牒客到有詩筒冷署憑來往浚杯話不窮

誰謂陵陽小仙人作吏曾高風未冥漢之子復撐弘漢子明爲陵陽令以仙去卽今石埭也沉愛同慈母長齋似老僧俸錢餘幾

許悉以贈來朋

姜生東海彥文采動京華驛路君爲主琴軒客是家昔
曾窺宛委今始對茶瓜笑語渾忘倦城西月已斜

喜姚彥昭至

沛州官舍裏送爾去江關忽復五年別都無一日閒山
城重把臂市酒且開顏况有雲田老朝昏數往還

寓樓遣懷

谿上千峰雨樓頭五月寒欲歸仍未遂望遠不成懽賈
客乘輕筏奔流下急湍倘能隨汝去三日到長干

文廟納涼

同王名仲時吳姚彥昭作

何處堪逃暑披襟入頽宮松根無畏日蓮葉有香風禮
法聖賢恕窮酸客子同解煩宜薄酒不是爲囊空
任崧翰寓齊小飲兼懷令弟克家

日日擬相過無如毒熱何涼颺生雨後假館似巖阿客
至盤殮易情親笑語多早秋來雁影佇立望江波

畱別郭昆冶太守

古郡多良牧包何名最都公來成鼎足民誦匪阿諛問
俗求遺老流光及腐儒未知前二守曾有此風無

夜泊清谿同潘崑生

少年嘗泊此烟火近千家亂世遭兵燹秋江剩蓼花
多蘆盡蝕賦重額頻加觸目增新感同舟客亦嗟

從川訪聖羽兄

同學凋零盡惟君七十餘白頭仍健飯清夜亦鈔書
老友長相憶荒江無定居勸予歸隱好何處有田廬
維揚曾薄宦畜酒待嘉賓好我更分俸言歸期作隣時
艱願不遂吟苦老逾新十月毘陵去清谿訪故人

九月八日同張僧持王左車宿石頭庵贈遠逸上人

爲愛黃花節先期出郭行秋山沿路好谿月半輪明
上客初返僧持方自吳興至竹間僧有情相畱過寒夜高枕聽

鐘聲

施愚山枉駕艸堂闕于展待因訂尋山之約

荒園來我友一飯未能畱知爾肥甘厭翻爲雞黍愁攝
山烟外寺高座竹間樓或有前年興追陪出郭游

至日

至日長爲客今冬客始還那知家室苦轉覺道途閒祀
祖禮從殺謀生粒亦艱淡慙袁處士忍餓閉柴關

寒食有感

以下戊申年作

京國重來寓蹉跎又十年故山餘吉壤母氏得新阡正
值禁烟節難歸上水船遙知塋兆側芳草正緜緜

酬戴其懷學博見訪之作

聞爾官江縣真成吏隱兼松風吹講席花月照書籤薄
祿何須問閒身且暫淹只愁豪舉性渾不耐鑿鹽

前歲來京國和陽客未還相思虛命駕重到喜開顏
草率牀頭酒晴明郭外山歸期如尚緩排日共追攀

上巳東王壻安節

何處堪修禊芳湖西復東侵晨期命駕細雨濕花叢泥
滑應難往尊開誰與同隔城遙憶汝亦閉小樓中

城南罌粟園看花

三首

今年花事少稍喜鄧家園倏忽春光盡何爲愁緒繁聞
知有南圃力疾去東門恰恰輕陰好全無日色暄
小園方數畝俱是麗春花勿謂村莊老翻憐富貴家樹
陰多設席客至必擎茶題詠還須酒無錢亦可賒
爭誇紅紫艷誰解白芙蓉意態神仙立肌膚冰雪重與
梅同素性惟藕並高蹤莫道栽培易滴濡秋復冬

喜徐仲光雨中見過因畱宿各賦二詩

還山五六載又復向陪京知已逢苗令藏書賴梓成

新城

令苗養爲仲光
刻文集六卷

青谿尋舊友白髮話前生猶記瞿公語

楞伽石慧明

往仲光來金陵寓三忠祠其同寓瞿公夢
神告曰汝欲題像有南嶽石慧明師在僧

問慧明爲誰神曰卽樓中與汝同
住者也次日僧言其夢予得聞之

貧居無俗客一飯不輕畱斗酒期君醉徒行冒雨愁衡
茅堪下榻笑語且忘憂枕畔餘羣籍三更閱未休

午日喜周仲宣胡逸菴汪少室見過

不問秦淮渡寧同楚客吟懷沙猶有恨邀笛亦何心薄
酒浮昌歎荒廚愧金鷺三閭遺集在披豁當登臨

樓居對雨

冥冥江雨至汨汨野塘流密竹涼侵坐遙山翠入樓經

時愁酷暑此日似新秋高枕還思酒無錢何處求

友人齋頭看竹

種竹自何日抽梢已出牆北風疑作雨西照亦生涼江
月隨人至山杯引興長渾忘在城郭只擬對瀟湘

李笠翁齋頭同王左車雨宿

故人新買宅忽漫改爲園疊石巖當戶看山樓在門客
來塵事少雨過瀑聲喧今夜那能別連牀共笑言

七夕送徐子能歸吳門

休夏同蕭寺過從不厭頻可憐今夜月偏照白頭人久
客無佳况將歸守舊貧安能似牛女歲歲會河濱

七月十五夜宿鄧木上齋頭同錢湘靈作

春華開似錦曾一醉南園秋月明如鏡重來臥北軒窺

窗叢竹影親枕候蟲喧况復蘭英吐幽香入夢魂

同黃仙裳飲周湘芷宅兼懷顧與治先生

旗亭淮水上曾解杖頭錢明日又嘉會涼秋正好天盤
殮無俗客詩律本前賢酒隱堂何在臨風思惘然

贈邢命石

臨邑邢子願先生之孫也

太僕書名大來禽集亦傳文孫能接武繪事復爭妍游
覽秋江外居停古渡邊客窗惟翰墨揮灑過霜天
知我閨人病先貽上黨蘼結交何必舊邂逅卽同心秋
水平朱檻涼風吹素襟衡茅亦不遠無事日相尋

次韻黃仙裳見過小飲

貧居人事少蕭寂類山僧有客來蓬徑呼兒摘豆棚甕
餘前夕酒譚盡小窗鐙亡友遺言在重書感慨增

仙裳有孟

貞贈詩命子
代書入冊

石埭道中

客行期五日十日尚遲迴
小艇逢灘淺長年下水推亂
山多猛虎激湍似奔雷
艱險明知此何爲數往來
遇沈方鄴

送爾嶺南去秋蘭花正芳
如何仲冬月尚在古陵陽
百計營資斧重裘犯雪霜
相逢驚且喜把酒話偏長
宏潭遇姚彥昭

聞爾來游此吾今得與俱
那堪中路側下馬立斯須
客久裝猶薄天寒歲欲徂
陵陽有丹溜歸櫂必沾濡
石埭遇汪少室卽送其還里

汨汨歲將暮悠悠客未歸
不知誰繾綣相對各歔歔
爾

少才華富吾衰筋力微愁看谿上鳥南北又分飛

題屈翁山詩集

周南存漢廣誰謂楚無風爾祖離騷賦人言小雅同本
支猶未墜菰苑復稱雄千古沅湘意今歸五嶺東
除夕前三日騷人質此詩謂予年已老吟事稍能知碧
海鯨魚力蘭苕翡翠姿想君攜嫵婉驅馬塞垣時

潤州訪王甓亭學博

以下已酉年作

廣文兼吏隱况復得名州繞郭江山麗傳經弟子優官
貧無長物客至有新筇老友情愈篤因之兩日畱

喜晤錢馭少高士

二十三年別重逢似隔生積懷言不盡客路又將行離
黍片時事河山萬古情君顏猶未老或可見昇平

初至梁谿訪顧修遠適周子淑徐原一諸君皆至
因畱飲至夜爲贈此詩兼贈令嗣天石

論交三十載今始上君堂恰有羣賢在先聞春酒香妍
談至淡夜痛飲發清任意氣渾如昨相看鬚已霜
故人才力健重注杜陵詩吐納兼風雅蒐羅歷歲時藏
書無不有問字復何之安得牆東隱朝昏餉一甌
階庭多玉樹大者更凌雲自是鷓鴣侶非同麋鹿羣詩
篇還質我福澤總輸君客舍蕭條甚頻過莫厭勤

贈吳伯成明府

一水梁谿道頻年數往還聞聲思茂宰延首咏高山芳
草無由合喬松今始攀澗泉新汲好先欲浣塵顏

丹陽訪吳襄宗同至姜子恂園小飲復回襄宗宅

談讌竟日紀以二詩

醉李逢除夕同君古寺棲擁爐談韻學看雪步村畦客舍聚還散游蹤東復西二年勞夢想及此手重攜

言尋姜子宅倒屣至門前會面始今日傾心自昔賢

往孟

貞與治亟稱子胸不置

濃陰先設几高館復開筵向夕猶難別提

燈送上船

上河曉發

東吳歸未久又欲去荆南身世惟孤艇琴書共一擔江寒猶可耐炎熱最難堪何日山林裏巖居結草菴

同姚開仲夜坐因憶其兄玄長

故人豪傑士謝世已多年聞說大兒好今逢令弟賢丰姿猶彷彿意緒亦纏綿夜坐高林下青鐙爲黯然

立秋夜獨酌

炎夏酒長戒涼秋思一杯素交無處去窮巷少人來露
坐依修竹鄰醅得舊醅微醺宜臥簟吟咏復遲迴

秋浦善慶菴訪孫臥公

寒食來江縣侵尋及早秋自耽山水趣非直稱梁謀竹
院吾相訪松風客易留因之具雞黍一話十年愁

攝山絕頂

下方惟見石不信有柴荆仄徑盤空上危峯到頂平夕
陽千嶺秀春水一江明愁絕浮雲外蒼茫舊帝京

龔山續集

皖桐方文爾止著

壻繡水王槩安節訂

七言今體

寄懷沈睂生徵君

以下壬寅年作

君去蘭江十幾春歸來疑是爛柯人
龐公足不履城市陶令兒皆習隱淪
往事傷心歌黍稷今秋屈指訪松筠
雖然避客難辭我我亦淮西老逸民

宋其武少叅枉顧舟中兼送酒資謝之

先公先子同門友詩酒流連氣誼深
我復與君齊齒髮才難如命各升沉
昔游燕市曾題句今泊龍河又惠音
分俸雖微情自篤結交元不在黃金

送陳二如鄉貢北上

龔山續集

卷四 七言律

虔州歸艇泊江灘老友相逢分外懽今夜西窗重剪燭
來朝南浦卽登鞍文辭瑰異人爭識狀貌魁梧亦好看
此去金臺有奇遇知君定不是微官

李條侯尊人雙壽

人間怙恃罕雙全况是同登大耄年偕隱允爲希世瑞
延齡不藉養生篇慣邀鄰曲斟春酒閒看兒孫種水田
安得移家傍吾友時時地上接真仙

丘曙戒侍講招飲話舊贈此

歷城聞爾謫瓊州瘴雨蠻煙天盡頭只道微官淹海嶠
那知隔歲返田疇新詩絕勝綠經險舊友重過勸乞休
頽仰之間多樂事垂竿淮浦復何求

畱別徐子星給諫

菰蒲風冷雁初飛我去長淮君正歸故舊相逢情自篤
關河有酒願無違頻年畫省多封事此日青山暫息機
野老卜居桃葉渡平安煩與寄柴扉

送從孫有懷歸江南

汝向洛州省婦翁歸船恰與外家同停橈且醉南池酒
策蹇仍觀闕里風遂有詩篇超物外爲將書信寄山中
汪生欲訪幽棲處到日相攜問桂叢

內姪汪策以與有懷同舟

登岱不得觀日悵然有作

前年曾上日觀峯夜半披衣見赤龍隔歲重來梁父道
罡風先折大夫松補尋石屋雲偏晦再躡天門雪已封
可見勝游元不易必須旬月始從容

謁魯兩先生祠

一爲孫明復一爲石守道石乃孫弟子故側坐

霜晨徐步入荒祠魯兩先生儼在茲高坐抗顏如講學
歛容侍側爲尊師白頭纔著春秋論青史猶傳慶曆詩
却訝當年何坎壈豐碑讀罷繫人思

祠中有施愚山碑文

送兄子竹西歸里

幕府相依十五年論交誰似此纏綿雲天高義應難別
烏鳥私情汝自牽霜月暫須歸子舍花時又可促征鞭
白頭健飯休多慮羣從爭推負米賢

竹西爲澥林李先生客凡十五年今

以母老
辭歸

我老移居向白門山田無以繼養煢囊書每赴故人約
刻骨難忘知己恩

謂澥林也

與爾燕齊頻聚首言歸淮泗各

傷覓餘年安得同巖壑朝夕婆娑松桂根

題劉永錫將軍畫冊

官舍何當入畫圖
主人情況自高孤
登壇耻作糾桓態
閉戶寧爲博雅儒
蕉葉題詩書亦妙
槐陰畱客酒頻酤
眼中多少乘軒者
得似劉郎更有無

贈岳鎮九進士兼懷趙無損

前年曾過汶陽城
特地城南訪趙生
同舍有緣多載酒
思君未見最含情
相逢闕里歡如故
却望長河凍欲平
僕馬催人容易別
今宵痛飲至鷄鳴

寄懷陳襄雲處士

六年書札不相聞
但遇同鄉必問君
傳說病身羸轉健
算知賢子長能文
高情玩世歸巖壑
浪跡憐予逐水雲
乞寫一枝蘭菊影
草堂朝夕對清芬

宿遷晚泊

有客南歸遇順風黃河北岸駐征篷孤城隱隱寒原外
三戶蕭蕭秋水中獨把閒杯對舟子憑將往事問漁翁
伍胥項羽今何在落日長淮望不窮

伍項俱下相人下相卽宿遷也

送郭鞏之歸山右

何物微官絆此身六年流滯大江濱曾經刑獄幾爲鬼
歷盡風波始是人歸路獨攜黃髮子倚門猶有白頭親
秋田釀黍堪娛老莫向燕臺再問津

贈鄭梅龕

兄弟同心世所難君家獨有古人歡卅年養母不分產
兩室生兒無異觀負米自能炊玉粒藏書亦可抵金丹
相期共作牆東隱慎勿蒼茫憶築壇

鄭方應武舉

送周元亮使君之任青州

少年出宰古濰城一劍曾當百萬兵遂有蘭臺膺帝

簡至今蓬海誦公名星軺重指穆陵路畫舸將爲春水

行獨惜山東風景異憑高望遠不勝情

元亮起家濰令時山左蹂躪所

望無堅城濰被圍久元亮以一書生乘障親集鐵其身城得保全濰人至今稱之

魯國纔歸歲序殘聞君元旦發江干尚無薄酒旗亭醉

翻荷嘉招雪夜歡總爲平生好風雅不嫌賓客半寒酸

岱宗闕里吾遊慣只恐瑯邪興未闌

寄任玉成御史

以下癸卯年作

舊京人物凋零盡江北猶餘獬豸冠肥遯自應藏土室

浮榮未必勝漁竿梅花詩索山僧和竹葉杯從野叟乾

却笑門前來往客不辭風雪跨征鞍

贈智劍大師

槁師出世大英雄

麻城梅槁木棄百萬家學道故云

師與同鄉道亦同

少學兵書三府辟老歸佛法萬緣空蕭蕭白髮秋霜後

黯黯青燈夜雨中回首江淮渾似夢圍城屢次建奇功

師曾爲史閣部
參軍屢破賊

雪後東從子象山

時寓鷺峯寺

春雨霏微已不禁那堪積雪蔽園林遙知荒寺擁爐客
定學寒蟬抱葉吟病取杜詩爲藥餌閒看文冊當登臨
來朝挈伴衝泥出溪上梅花試一尋

答王無異辛卯見懷四首

十二年前客舊京曾將嘉句寄山城尺書無便酬知己
千里相思望月明昨歲渡江纔會面開春移寓更多情
旃檀咫尺通桃葉日日溪邊攜手行

無異往寓僧寮與
予草堂相望日久

過從

東園往昔杏千株樓閣陂塘似畫圖亂後可憐成廢圃
花時不忍再提壺尋春且向長干道縱酒何妨野店沽
正學祠堂堪痛飲忽瞻遺像又嗟吁

草堂地近東園曩日杏花最繁予與

無異猶及過賞

六朝名蹟徧江東牛首棲霞更不同遊覽人皆嫌遠道
追攀君欲趁和風攝山窈窕神仙窟天闕嵯峨造化功
結伴便應乘興往暮春臨別復怱怱

相訂有天闕攝山之游皆以事阻未

玉女頭盆山下居亭名獨雀意何如雲霄祇合仙人馭
石戶休勞徵士書且與蘇耽同避世豈惟支遁解憐渠
老夫他日遊西嶽定訪胎禽到爾廬

送何第五之任廣州兼懷施尚白周計百

東風駘蕩柳條新
君去番禺作逐臣
雖入蠻鄉猶少瘴
況司鹽稅未全貧
江干一路山如畫
篷底孤吟句絕塵
想過蕭灘與章貢
憑將尺素報情人

夜坐

破屋寒燈昏復明
紙窗獨坐到更深
更一杯濁酒有妙理
四野荒雞非惡聲
少日功名空自許
老年勛業竟無成
灰心只合歸禪悅
莫向人間歎不平

潤州訪張季昭陳尊已李木仙諸子

不到京江十五年
江城朋好尚依然
屢經兵火家皆破
盡改鬚眉意可憐
握手但增新涕淚
賞心猶記舊詩篇
山游幸喜爲同伴
僧舍何勞費酒錢

偕周兼三潘江如吳襄宗皮以立游焦山

丁卯橋邊花正紅看花日日與君同
天晴便有焦山約寺古猶餘桂樹叢
龍鼎自周年更遠崔銘疑晉字何工
嘉游亦覺江神喜朝送南風暮北風

姑蘇道中

平生最愛吳江水狹港斜橋處處通
漁艇載妻兼載子艸衣禁雨又禁風
湖梢密樹知農屋林際高旛識梵宮
安得攜家來此隱時將煙棹入空濛

登虞山

客居卑溼又塵氛獨上山椒望海雲
亂草久荒虞仲墓高松還覆子游墳
土中埋沒尋殘碣石上依稀識舊文
老子祠堂最高曠流連不覺至斜曛

別錢牧齋先生

我客虞山暑正煩十朝九扣先生門持杯不惜荔枝酒
穿徑如入桃花源古人命駕輕千里烈士酬知重一言
臨別依依更回首相期冬月再過存

休夏

家在青溪古寺東閉門休夏與僧同參差水竹不愁暑
爛熳園蔬未覺窮况有閒書消永日因之高枕御涼風
一盃冷飲猶嫌熱繩繫銅餅墜井中

喜鄰人見訪

園叟溪翁比屋居葵邊抱甕柳邊漁顛毛有雪雖衰矣
土銼無煙常晏如從未開門延俗客偶扶拄杖過吾廬
濁醪麤飯休推却仍是君家魚與蔬

艸堂

艸堂何處避炎威
堂背新開兩扇扉
南北氣通風力大
東西樹接日光微
簾紋似水容高枕
鼻息如雷撼薄幃
夢裏忽驚山雨至
晚涼纔著一絺衣

白屋

白屋三楹覆白茅
青溪一帶似青郊
門前種圃多蔬甲
牆外編籬長竹梢
守拙自無塵事擾
遺榮猶有俗人嘲
鄰翁善數通河洛
筮得山風第六爻

河洛數以人年命
符易卦予得蠱之

上九日不事王
侯高尚其事

立秋日紀伯紫見訪草堂

是年伯紫
遷居儀真

君去真州五月餘
江鄉雖好歎離居
交游已倦惟扃戶
父子相依更讀書
舅病關心來故國
雨涼徒步到荒廬

不勝契濶憑杯酒況是西風落葉初

送吳不官還六合

君家震澤兩山中招隱無非桂樹叢何事往來如社燕
可憐飲啄類江鴻頻游故國秋多感間出新詩老更工
自笑幽蓬能斂性白頭猶未就幽蓬

不官賦斂性就幽蓬詩逢人索和

喜從子還青少府見訪感舊

筮仕無端去極邊關西佐郡又三年程書只是多吟卷
飲水何曾問俸錢家轉貧于未選日老仍歸種故山田
等閒不冒游城市高臥楊灣意迥然

還青官後甚貧窘楊灣迥還青舊居

今重事南畝也

羣從誰如爾一心却爲姻亞更情淡時危每歎孤生竹
道遠猶分數餅金此日青溪重命駕方秋白雪已盈簪

安能二老居鄰接晨夕披衣共苦吟

聞張子干捷音有贈

桃葉溪南秋水生荒園積雨喜初晴老夫懶問門前事
童子喧傳榜上名鄉里推君才獨絕尋常好我意非輕
若今天路皆如此無復崎嶇嘆不平

與紀伯紫同舟至儀真而別

詩成愛與爾商量所恨離居各一方何幸秋江同道路
不嫌寒雨滯舟航連宵始盡篋中集明日重登君子堂
無奈真州又分手淮南煙樹鬱相望

揚州九日同王貽上司理登蜀岡觀音閣

卽迷樓故址

蕪城西北有高丘當日繁華逐水流月下游魂來煬帝
塚邊衰艸失迷樓山川只是僧長在風雨何曾客不愁

恰喜新晴逢令節憑闌一望思悠悠

送黃心甫游青州兼懷周元亮使君

何事殘秋客廣陵與君同寓意飛騰連朝赴飲鳴雙屐
每夜攤書閃一燈白髮雖多身轉健青州獨往興堪乘
侍郎亦有山東約我欲相從恨未能

從兄坦菴先生招飲寓齋看菊率成二首

白髮新從紫塞還淮南處處是家山高秋濟水先停櫂
長夏蕪城又掩關自有真詩娛老眼不須多酒破愁顏
此邦雖好兒孫遠歸去青溪明月灣

兄客刊溝而子姪皆家白門故欲其

也歸

猶記霜天人舊都時時酒脯慰窮途榆關一去腸堪斷
棧壘相望眼欲枯舟泊黃河驚會面盆移白菊喜提壺

從來小謝論詩合爲我重題王子圖

子與陶杜白三公皆王子生有四子

白母八十壽詩

孟新仲謂之母也

三十年前客舊京與君兄弟定平生登堂曾拜茅容母
判薦能成陶侃名佛閣誦經持殺戒孫窗拄杖聽書聲
世人不識滄桑理獨有麻姑眼最明

漫興

半世飄零東復西白頭歸隱舊青谿功名盡付一盃酒
祿命仍餘百甕齋饒不能齋惟戒殺客無可饌又烹雞
時時勸我中廚婦何必盤餐定整齊

與吳賓賢同宿汪舟次齋頭有贈

秋窗曾讀陋軒詩海岸遙憐冰雪姿趙壹頗爲鄉里笑

虞翻猶有一人知今宵同夢何其愜明日離羣重所思
肺病三年無藥餌苦吟切忌苦寒時

章縫村夜宿

又去南池向堯西路經嘉鉅夕陽低章縫自覺村名古
稼圃當爲儒者棲逆旅雖荒聊繫馬勞人方寢便聞雞
來朝想見陶丘宰索飲先拚醉似泥

贈韓五仲連

前太史芹城先生之弟也

家難如君不忍陳江鄉何處可垂綸欲游洱海艱資斧
先向陶丘訪故人官舍相逢霜氣冷旅愁又見歲華新
天南萬里終嫌遠酒島詩崖且卜鄰

酒島詩崖在潛山韓有親舊方官此

初度有感

定陶馬正誼署中令嗣思公政公同飲

以下甲辰年作

竹馬嬉游如昨日俄驚五十又三年井泉不食吾無恨

滄海橫流劇可憐東魯近來頻作客南都歸去始求田
家人此日遙相憶知在風塵何處邊

臨邛待客情雖厚司馬千人願未諧開歲尚期之竟樂
歸心無夜不秦淮也知學稼山山稔爭柰謀生事事乖
況對崔陵好兒子當筵尤愴侍中懷

後來第一我獨無此令人傷懷

李侍中神儻云昨見崔陵兒瞻遂爲

得馬壻永公書

片札傳來自蚤春勸予歸隱意何真祗緣牛首買山計
敢惜馬蹄行路頻乞食且從謝仁祖起廬還待郗嘉賓
今秋倘遂田居願誓不出門干謁人

送孔士崇之任宣平

黃河南岸雪初融君渡黃河便不同一路山川如畫裏

三春花鳥在舟中，蠻鄉只合彈琴治家法。仍傳平準風，
我有故人方佐郡。憑將尺素寄甌東。時嵇叔子爲
温州司理

畱別毋曹州承乾

刺史風流天下聞，春城畱客意慙慙。香醪不惜千鍾醉，
廉俸何當兩鑑分野性。疎狂應恕我窮途，沾潤敢忘君
他年五馬來南國。漁釣重披江上雲。

送趙月潭太史歸無錫兼懷牧齋先生

桃葉渡頭鉏小圃，鷺峯寺裏寓高人。幾回相訪無多路，
忽漫言歸各損神。江國風濤渾朔氣，家園花鳥正陽春。
開尊若見虞山老，爲說新秋再問津。

出太平門望後湖

玄武湖邊風日悽，行人策蹇舊長隄。刑曹撤後兵添塚，

圖籍空來菜作畦豈有荷花隨水長尚餘蒲艸入煙迷
春游至此腸堪斷况復頻聞杜宇啼

棲霞寺訪竺菴禪師

覺浪大和尚首座也

蕪江相遇共登臺曾誦葡萄好句來十六七年流水過
兩三四處道場開攝山重建本師塔弘法爭推絕世才
我亦遠公門下士自慚白髮老塵埃

吳饒州見末枉駕艸堂出其近詩相質因及孟貞
與治有感而作

老友新歸自粵東重過南國訪幽蓬十年仕宦頭應白
千首詩歌興不窮昔好風華猶習氣今知淵雅是宗工
傷哉邢顗俱搖落花下提壺誰與同

喜晤岳聲國進士

季子祠前樹拂雲停舟相訪寂無聞那知茗水先爲客
纔入孤城便遇君篤念舊交勞夢想流觀新句絕塵氛
飢輒況有烏程酒百遍過從不厭勤

嚴蔚宗孝廉招飲有贈

潮音橋畔水鄰鄰晝掩柴扉迴絕塵何事嘉招無別客
祇緣微尚獨相親頻年破產休嗟嘆此日全軀合隱淪
不見披裘與賣卜古來俱是姓嚴人

送張則之歸京口

漂泊茗溪四五旬老懷偏與故交親不辭酒醖過從數
況有詩篇唱和頻忽漫言歸當盛暑雖非得意亦逢春
若翁壽考兒英妙自是人間介福人

王徵宣孝廉招集遙青書屋并送其游福州

先後淮陽作寓公詩篇流布意潛通班荆直至七年外
招飲渾忘六月中舟遡雲溪尋古巷窗臨射圃納涼風
浮瓜沉李堪畱客炮鼈烹魚何太豐

聞說清秋游八閩同舟恰喜有詩人

微宣與喬孚五同往

山川奇

絕吟逾壯故舊歡然旅不貧節過荔枝休悵望霜迎蜜
橋更鮮新獨憐好友難爲別白雀黃龍且問津

龍洞

雀寺黃

湖州西北有白

葉明府紫羽招游畧書溪

陽羨餘千兩畫溪此溪清絕著湖西

宜興亦有畧畫溪而長興較勝

重

會無復千尋木孤閣猶殘百尺梯況有神仙爲令尹不
辭賓客共攀躋賦詩行酒淹長晝歸公河橋日已低

喜從弟漢士見訪

龔山續集

卷四七言律

十一

久客茗川黯自悲
竭來羣從稍開眉
百年過半同吾老
二子連生覺汝奇
秋橘冬橙應有候
霜髭雪鬢不須疑
江鄉歸艇催人急
也是藍田種玉期

戒酒

酒以忘憂昔所聞
況逢名酒味清芬
興來每不論升斗
病劇方知是斧斤
從此暮年裁痛飲
卽當寒夜亦微醺
操持漸久渾忘却
便可長齋不如葷

題周計百看山樓

鬱孤臺下水交流
霜月曾經此地游
痛飲難忘司理署
高吟重起看山樓
開尊醺集誰能賦
佐郡廉平百不憂
只有些些惆悵事
煙波未遂五湖舟

煙波吳女名計百定爲妾而爲豪強

者所奪故云

寄懷王涓來侍講

都門別後少音聞無限交游獨憶君
準擬越來成會面
那知兵過使離羣還鄉定出龍江路
枉駕期看鳩閣雲
不則吾當相就語霜天波月白紛紛

送王望如補官北上

王郎弱冠逢仙客手授丹書理數兼
自信功名當遠大
無端禍患亦安恬年華雖艾仍如少
時論方推寧久淹
努力驅車向京國蘭臺芸閣不須占

送周雪客省侍之青州

將與望如同行

春去齊州秋始還冬晴又指穆陵關
思親敢謂征途遠
結伴偏逢老友閒月下同舟渡江水
沙邊立馬看雲山
知君行李無多物只有新衣五色斑

喜從孫董次見訪艸堂

爾去靈巖結好因村居雖僻遠羈塵身閒努力爲詩伯

年少甘心學逸民交有縈河真莫逆縈河吳越士也與董次偕隱才

如明圃更無倫明圃董次觀叔子雷也詩最妙過江每念龔山老把酒

看花日幾巡

哭程少月山人

日中猶向艸堂來月下還同野衲盃是夕三更忽奄逝

何曾一念稍徘徊可憐知命能安命程精于五行家言況負詩

才與辨才不肖死于妻子手故將冤鬼傍蓮臺先是程每家居

是日就宿報恩寺遂卒

往歲江淮賣卜行布衣端坐傲公卿年來獨喜長干寺

都下爭推季主名日有千錢惟縱酒家無斗粟亦忘情

兒年正少書能讀只恐孤寒難治生

與子貧交十六年白頭相對更懽然談言微中真奇術
義利分明亦大賢方擬入山謀共隱那知撒手遽游仙
達生順死應無恨獨使良朋涕淚縣

爲陳俞公五十初度

雞籠山下是君家手種東籬十畝花性烈也同霜不畏
客來那惜酒頻賒昔忝幕府多兵畧今返丘園改歲華
駟馬軒車易傾覆何如野老話桑麻

曹子顧秘書見訪感舊

猶記當年偕盛生飲君谿閣話三更別來萬事滄桑改
老去重逢鬢雪盈却訝田居蒙吏議也知兒戲是榮名
雨花桃葉堪游賞買酒無錢空復情

寄懷五兄凝齋七十

任城官舍話終宵
來日登艫意寂寥
白髮那能事干謁
青山應不負漁樵
歸偕令子田園穩
醉吐新詩壘塊消
睂壽定齊猿與雀
獨憐鴻雁碧天遙

寄懷許韻遠

二十餘年契闊情
不圖茗上得班荆
乍看容鬢非當日
回想京華似隔生
握手那能淹野寺
揚帆便欲去江城
惟期獻歲來南國
斗酒雙柑聽早鶯

去京口之前一日杜蒼畧見過送以詩荅此

沍寒只合臥溪山
底事長江往復還
豐歲絕炊殊可異
殘冬乞食亦何顏
交游見爾貧逾甚
歎息千人老未閒
獨有平生詞賦在
歌聲金石動江關

爲梅杓司悼亡

自爾驅車入薊門
閨中思婦獨傷魂
盛年天折雖由命
平日乖離亦少恩
肉枕尚餘雙淚漬
紙窗空對一燈昏
外家兒女方孤幼
莫便先歸湖上邨

喜施愚山使君至卽訂棲霞之游

十月星輅過舊都
江亭一宿便馳驅
懷人不見書空寄
奉使才歸歲已徂
勿迫尚思游古剎
追陪必欲待潛夫
非君逸興誰能爾
忙裏偷閒世所無

同愚山登攝山頂

薄葺聽泉憩石橋
侵晨披霧蹕山椒
長江一綫水初落
老樹千章葉盡凋
且就高僧談上乘
更尋殘碣認前朝
却嫌輿馬催人急
白日黃塵去路遙

立春日何第五招同愚山夜集兼呈令兄次德
卜築青溪少四鄰君家兄弟獨相親每逢好月思良晤
况復寒江來故人雪酒不辭今夜醉風花又見一年新
烏衣巷口多芳草明日重過是早春

除夕戲爲數詩

自一二至億兆共十九字

五十三年過半生人間萬事一無成孤懷只有詩千首
雙闕何曾見兩京四海八荒同戰伐二儀七曜也縱橫
運移百六兼陽九億兆同心想太平

人日飲從子邵村宅

以下乙巳年作

前年人日草堂中別後關河路不同炎暑獨馳汾水北
癸卯六月邵村往山右 沍寒猶阻嶧山東
是年子客定陶未歸 今春歸舍復
何恨竟夕持杯莫放空酒罷忽聞私歎息蕪城畱滯白

頭翁

天界寺訪笠山師

早春猶未出城南聞說梅開試一探不見嚴遵居卜肆
程山人少月去冬新歿獨尋惠遠到伽藍看花無復當年興啜茗
聊爲半日談爭得離家拋俗累香燈從此奉瞿曇

元宵書王元倬先生詩後

開春風雨雪全無列炬張鐙徧九衢老我柴門何冷落
誦君詩句足懽娛才華豈獨高楊並高季迪楊孟載心事惟同
謝鄭符謝皋羽鄭所南深夜北窗猶較閱今年元夕不空徂

哺雛軒獨坐

谿邊小圃竹間樓且喜今春未出游七字苦吟宜暫輟
六書精義恣冥搜飢寒何足關人慮著述真能解我憂

却憶去年正月裏定陶騎馬到曹州

正月晦日喜姚六康孝廉見訪

老大偏逢節候驚三春花鳥倍關情
嘉辰安忍閉門坐野衲相邀出郭行
忽報良朋來嶺海况攜仙藥饋柴荆
一杯且共今宵話明日江頭送遠征

送姚六康謁選北上

浮雲游子各天隅十載重過悲喜俱
聞說溪山多猛虎何如強仕得飛鳬
長齋豈復營家計薄祿惟應散酒徒
但願江淮名勝處故人舟楫不艱虞

二月初五日雨

自冬徂春一百日上天不雨下民咨
薄田旣累那禁旱公稅猶逋敢望私
夜聽茅檐聲滴瀝曉看花檻色榮滋

再添三尺陂塘滿直到農家浸種時

倪闇公四十初度

倪生弱冠佩瓊琚屈指爲郎典石渠豈料壯懷猶寂寞
每逢初度却歛歔古人學道尊無比亂世安貧富不如
况爾才名已流布王維詩句李邕書

施愚山書來却寄

寒風蕭瑟去江涯除夕蒼黃始抵家春酒人爭浮栢葉
閒情君獨咏梅花兒婚已畢向平願期迫難淹博望查
想到署齋新誥展鳳冠魚帔更堪誇

愚山新受封特爲其夫人製冠帔

吳弘人見訪草堂

經過笠澤正拏船欲訪良朋興索然稍喜芳春重聚集
生憎俗事又拘牽偶閒便約來谿舍屢空何繇得酒錢

惟有新詩共欣賞夕陽相送短籬邊

上巳日湯巖夫王左車黃俞邵程子介馬永公王
安節次第見過因畱小飲賦此

春色三分減二分無端風雨歎離羣忽聞好友來晴圃
且坐荒齋看水雲研究六書良足樂縱橫衆說未前聞
蘭亭修禊尋常事莫羨當年王右軍

雨後閒步

城居最喜是春陰風雨全無俗事侵把酒量從中歲減
著書識到老年淡貪看細字頻傷目閒步荒園一散心
忽見柳塘新水漫興來不覺又微吟

三月十九日作

年年此日有詩篇篇什雖多不敢傳鵬亦知時宜閉口

鶴因沈痛必呼天，銜哀只似髻初斷。迸淚其如眼欲穿，江上春陰更淒苦。蒼茫白水浩無邊。

過水草庵弔黃海岸先生

靈谷西邊銅井東，昔賢於此化長虹。平生修證方成道，大事因緣豈是空。野老題詩紛滿壁，行人下馬仰禪風。從今水草菴前路，直與燕山柴市同。

三月晦日送黃子捷歸建昌

芳晨出郭送春歸，又送歸人指落暉。旅食傷僧惟有粥，窮年作客尚無衣。世情誰恤忠臣胤，吾道寧安季女饑。努力山中勤稼圃，不嫌葵菽奉慈闈。

送竺庵禪丈還南嶽

攝山淡處好煙蘿，正藉談經柰別何。雲樹不忘衡嶽寺，

風帆直溯洞庭波五峯當戶塵氛絕六月休糧著作多
回首江東師塔在明年春水復來過

王左車招同湯巖夫龔半千楊古度程子介飲莫

愁湖上

郊居雖僻近名湖自與城中闐闐殊飽食一生惟笋蕨
出門數武卽菰蒲客來治具何其盛酒罷登樓不用扶
聞說盧家多好女至今還有莫愁無

同王阮亭祠部游牛首山

舊京山水探將徧佛窟幽棲尚未曾

牛首古佛窟寺
祖堂古幽棲寺臨

去江關時迫促不辭炎暑興飛騰曉穿石徑瞻雙闕夜
坐松樓對一鐙却訝前人碑碣少待君游記勒高層

阮亭

有金陵山水
游記十篇

送彭旦今之任丹陽

仕宦今無一可爲商量只有廣文宜身閒不廢尚書業

彭以書經名家祿薄長稱秀彥師况近家園將壽母每叅江郡
得新詩故人舟楫頻來往方物從君取料絲丹陽產料絲燈

寄懷陳襄雲

聞有詩篇寄秣陵三年夢想見何曾偶來舊友傳山信
似坐秋窗對雨鐙愧我風塵猶襤襪多君林壑絕炎蒸
欲遊湓浦當經皖爭得江樓一共憑

揚州東李長文使君

其太翁方病謝客

廣陵城外菊花時高館張鐙聚所知況愛能容霜髻客
多情不吝草堂資重來此地炎威熾三過君門典謁辭
稍待白頭翁健飯新秋芳徑一論詩

六月十七夜社集王仔園齋頭賦得聽詩靜夜分
舊京風雅蕭條甚忽覩蕪城氣象新日日水邊多勝事
家家樓上有詩人客來長夏尊偏滿話到中宵意轉親
敢謂知言似匡鼎羣公亦覺解頤頻

壽郝羽吉母

男兒志節且艱辛况是閨房孱弱人州郡同時皆遇敵
兵戈滿地獨全身養雛成鳳文章著剉薦爲芻名譽新
眼底滄桑何足算麻姑重見海揚塵

送劉興父歸秋浦

爾去都門歛四年一官雖授尚屯遭閒游直出河汾外
沃野還思慶曆前久客邊城身小病將歸故里橐空縣
江干相見銜杯好愁殺秋宵又放船

訪蕭伯闇新居

客裏移居最苦辛
七年三徙更愁人
此番水閣纔安穩
合與山妻共隱淪
檻俯秦淮宜過夏
樓瞻漢時不知春
同心獨有南陔老
咫尺何妨索酒頻

王元倬先生別號南陔

九日登木末亭飲景公祠

同游者鄧陽王幼華崑山徐揚貢繼水王左車

新安方寶臣程子介

九日年年不冝晴
今年九日最晴明
兒童相率登高去
老子何妨挈伴行
萬木全凋因世難
雙祠重構見民情
皇圖霸業俱荒艸
不朽仍歸烈士名

時方景二公祠新成

王壻安節以九日詩見貽走筆荅之

見爾來詩喜欲狂
閒情冷韻獨蒼蒼
祇疑寒瘦同郊島
不似公卿立廟堂
亂世科名雖可厭
少年富貴亦難忘

老夫自悔吟聲苦五十奇窮兩鬢霜

九月十五夜卽事

一年月色今宵好偏是囊空乏酒錢
霜氣初寒猶未肅秋亭獨步不成眠
醉鄉久曠因游輟織室長勤賴婦賢
幾欲拔釵吾又止來朝畱以繼炊煙

贈彭鍊師

昔年相遇狂禪客今日重逢老鍊師
高議能通仙與佛奇懷不廢酒兼詩
久游河北多丹竈暫返江南尚黑髭
遂有門人爭館粲三冬且住莫溪辭

送谷語師游武夷

琢鍊堆邊秋海棠繁花亂藥贊公房

天界寺有琢鍊堆乃宗泐禪師苦吟

處公居與堆近海棠最多

祇宜獨坐攤書好何事扁舟涉水長
山指

武夷尋舊塔路經吳會履新霜明年亦有離支約共入
興泉得飽嘗

荔枝亦作離支出
司馬相如上林賦

酬胡吉甫先生見贈之作

八十六翁猶未老新詩警策似中年黃昏更作蠅頭字
蕭灑渾如霍背仙望我生兒延祖澤知君學道本師傳

先生受業於
先司農之門

今冬果遂商瞿願買酒何辭賣賦錢

哭林茂之先生

隆萬遺民今已盡尚餘一老在山隈年登耄耋復何限
晚際滄桑實可哀病眼塵昏雖似霧壯心火熱未成灰
重生定作名家子不待垂髫景運回

笠山禪師初度

霜晴徐步出城來爲訪高僧琢鍊堆講罷雲封窗外竹

吟成香沁雪中梅廩山書問時相接公與無道人最善天界宗

風永不頽浪師久居天界公今繼之二十餘年了死生靈椿龜雀總

浮埃莊子冥靈大椿是二物

除夕

光陰本似箭離弦此日光陰更可憐馬齒俄驚六九歲

龍髯已墜廿三年虛疑景運來天上獨有愁心到酒邊

看曆一回腸一斷山妻知不為無錢

丙午初度以下丙午年作

平居初度感千端老大心情轉自寬滿地兵戈誰得免

苟全性命即為歡餘生但使貧而壽向學何論饑與寒

努力著書傳異代一年一部是奇觀頻年以來訂以歲成一書時六書貫

紛紛朋輩委塵埃我獨歸然亦壯哉身似忍冬藤不死
詩如曷旦鳥偏哀集成已得三千首興發猶能四十杯
但遇好花思痛飲茲辰况值早梅開

元宵雨集汪西京寓齋觀妓

鐙時小雨亦愁人况復滂沱夜及晨好事如君難閉戶
衝泥爲客盡閒身花邊更覺紅顏媚酒畔渾忘白髮新
二十年來相憶苦春遊排日莫辭頻

春雪飲鷺峰寺

三冬無雪長憂旱稍喜初春大雪飛密似楊花鋪野徑
閒將竹杖欵僧扉白鬚雅與吟肩稱采筆難教凍研揮
欲敵嚴寒多貰酒囊空不惜典緇衣

雪中柬彭寄菴

時寓隣菴賣卜

鷺峰西畔小樓孤晴雨皆宜雪更殊一派寒林真玉樹
半灣春水卽珠湖垂簾況有高人座躡屐何妨童子扶
聞說鄰家多美酒君平可破百錢無

雨後訪吳平露汪西京不值

經旬風雨不停聲咫尺河橋似隔城今日杖藜纔一往
誰家開燕已先行私疑粉面聞香澤各擁紅兒喚小名
如此春光偷背我來朝須罰酒盈觥

上河訪王汾仲

同行者吳平露汪西京方望子吳不移黃俞邵程子介王安節

二月龍江春水生一廛漁屋曉窗明高人獨擁棊書坐
客至猶聞絃誦聲前約屢愆因久雨羣公咸集喜初晴
欲攄離抱憑尊酒又趁斜陽策蹇行

閱鄭所南詩

億翁頭白尚無家流落吳門老歲華心史雖然藏井穴
精誠終不隱泥沙生憎地走人形獸也覺春開鬼面花
斯語至今猶妙絕一回吟咏一長嗟

二月二日平露西京置酒舟中送余行

早春欲往京江去風雨日多晴日希新水暴生聲瀾瀾
故人送別情依依乘舟且泛此溪好把酒先問何時歸
歸期五月未爲遠相約重登燕子磯

京口訪談長益

君去燕齊八九年歸來鬚髯已皤然階庭喜見嬰兒長
鄉里爭推大婦賢遜世豈應棲郭外買山自合遠江邊
詩文雖富未成集汲汲謀爲萬古傳

妙高臺看月

同陳翼仲省言上人

金上集
空江明月是奇觀况在金山絕頂看入夜魚龍潛水底
親人蟾兔落雲端煙波咫尺連滄海城郭微茫似彈丸
欲待鷄鳴猶不寐其如風露客衣單

贈李雲士

李生賣卜潤城中不與尋常日者同學本圖書兼象數
言依忠孝畧窮通百錢豈屑君平意二客長瞻季主風
好我論詩來夜夜短檠相對一鐙紅

談長益移尊過予招同韓叔夜吳乾行何雍南程

千一小集各賦一詩

東風無賴走江沙吹落城南萬樹花我欲探梅空悵望
君雖載酒亦咨嗟飄零俱是四方客在冉能教兩鬢華
更有鄢陵韓叔子十年薄宦未歸家

同吳園次登多景樓兼送其之任吳興

春江二月柳條青
画舸之官此暫經
爲念南徐多古蹟
重登北固望滄溟
舊交已是十年別
高興何妨兩日停
遙指櫻桃花爛熳
來朝連轡出郊坰

寒食日飲酒家

同集者關中孫豹人
中州彭士毅京口談長益
陳廷喜張季昭何雍

南程千一潘雙南張子義

江東又是禁煙節
郭北無非上塚人
久客未歸緣世難
舊交相見獨情親
水邊亭榭多春酒
花下衣冠剩逸民
不分青青垂柳色
欺吾斑髻漸如銀

清明日程崑崙司馬招同豹人其年小飲

客中正苦懽場少
江上俄驚勝友來

是日其節序關心
年初至

吾老矣雲山滿眼興悠哉
使君况有緇衣好公醺偏容

樽散才今夜燈前須痛飲不然懷抱向誰開

王詒白廣文招同董文友陳賡明游青山莊

蘭舟載酒出西門言訪名園近北村
水樹重重藏島嶼亭臺處處著琴尊
經營空有萬金費題詠曾無一句存
五十年間三易主其他陵谷復何論

端午後一日得施尚白少叅書是日適聞周元亮

轉江寧糧憲

舊交風雅幾人存屈指愚山與櫟園
稍喜官遷來建業恰逢書寄自章門
起廬欲待嘉賓至乞米先從仁祖言
秋月揚帆過蕭水賡酬知不厭頻繁

喜湯宮若見訪卽送其歸江右

維舟江岸正黃昏先扣青谿竹下門
脫粟那能充旅食

感懷無復報師恩

時訪其尊公門生不為禮

別來精進詩篇富歸去

倉皇暑氣煩知有白頭重慶在舞衣應不羨乘軒

是年宮若

之祖八十父母六十

答曹州何惟重見寄

誰傳書札自南華中有新詩字字嘉尚憶壺觴吟雪際

獨憐漁釣老江涯春將壽母娛雙綵夜共賢兄讀五車

安得重來桃葉渡茅茨咫尺是君家

維重兄弟幼時曾居青溪其河房尚在

在

露坐

日迫崦嵫尚未冥呼兒汲水洗堦庭艸根暑氣先秋失
樹杪風聲入夜聽病榻且宜三伏過書窗空負一燈青
閒中每憶平生友落落真同欲曙星

揚州晤顧云美感舊

論交三十六年前曾共秋林一醉眠此日才華方藉甚
如今容鬢各蒼然新詩旣得江山助古篆還從金石傳
知爾心期似皋羽西臺拊節有誰憐

云美出徐勿齋翟
稼軒兩公之門

答支山上人見訪之作

支公冒雪上匡廬攬勝探奇日不虛六月揚帆向江左
三山枉駕正秋初滿囊詩有烟霞氣近市庵非水竹居
琢鍊堆邊好師友

謂笠山
雪坡

亟移瓢笠勿躊躇

夜過七弟爾從寓中小飲

青谿稅宅近茅茨散屨相過不論時却恨新秋猶毒熱
直需淡夜有涼颼京江重到霍林寺石壁長吟馬素詩
卅角弟兄今白首濁醪頻勸復何辭

合肥贈唐祖命丈

六年不見唐耕塢老友常思聚會難何幸江城同旅舍
每千秋夜得盤桓銀鈎鐵畫鐙前字金谷銅駝酒後歎
卻憶當時游泳處青谿明月幾人看

答龔木公見貽之作

聞君卜築近方山水樹千重抱竹關圖史尚存先世業
亂離無改昔時顏貧交乍見情猶篤佳句雖投話未閒
我欲相尋棲隱地巖阿叢桂許誰攀

和州贈戴無忝兼懷令兄務旃

曾隱淳湖共若翁見君兄弟始成童旣經浩劫畱書種
卻訝辭家逐轉篷往歲游仙奇太甚今春歸娶道方中
秋林把臂不勝喜矯首還憐白雁風

姚作哲招飲話舊

記爾維舟桃葉時，催妝曾和戴邢詩。敬夫孟貞故人宿艸那堪問，賤子漂萍亦可嗤。獨有林園娛老眼，常將杯斝召新知。况逢舊雨情偏洽，日日相過醉不辭。

孫曼倩齋頭看菊

孫翁書屋蒔黃花，花萼雖平意態嘉。囊本無錢偏好客，鄰皆有酒却難賒。壁間古篆苟能注，嶺外游蹤近可誇。山水故知閩越好，明年吾亦去天涯。孫是年從閩歸

孫敏克鑿池得泉屬題

君家小築傍城隅，密樹高岑景物殊。天遣山泉出階砌，客來茶飲當邨酤。楊雄從不憂生產，劉毅何妨溷博徒。如此聰明如此水，焉知人世有潢污。

嘉興重訪陳子木

三十年前禾水客白頭重到自傷覓舊交艸木凋同盡
之子靈光歸獨存城市無家空瓦礫階庭有寶是瓊璠
杜門不與時賢接爲我同心倒一尊

飲朱子葆山樓

鴛鴦湖上雪霏霏老我重游心事違夾巷尚餘新戰壘
高人無改舊漁磯山樓荒落多幽致玉樹繽紛勝錦衣
况有芳樽能醉客河橋昏黑竟忘歸

贈大輿上人

客舍屢遷來古寺居停何幸得高僧殘冬閉戶寂無語
終日攤書知有憑榻近茶烟融凍研庭餘梅雪灑寒鐙
此時畱我焚香坐頓覺勞人百念澂

早春游弁山法華寺

同游者亭都會止山孝感劉子常錢塘周勿菴宣城劉民

長 以下丁未年作

幾度尋山水漲谿輕舸直至寺門西
梅花時節灘猶淺桑樹人家徑不迷
老興渾忘筋力倦歸途又趁夕陽低
紅塵白髮空流浪安得長年此地棲

嚴修人招同劉民長李望之葉伯如諸子夜集限韻

二月陰寒不似春霏微雨雪更傷神
蝸廬兀坐無人問雞黍相期獨爾親
坐上羣賢皆博雅酒邊奇字鬪清新
道場浮玉東風暖尚欲撥梅醉幾巡

羅鏡菴招同曾止山諸子夜集有贈

作客攜家不當游居停况有看山樓
窗間獨樹梅花發

郭外千峯雨氣浮，榻擁奇書多撥索。酒逢窮士倍綢繆，牆東咫尺爲吾寓。春夜頻過一散愁。

送曾止山之吳門

歲晏來游碧浪湖，主人聾聵不堪呼。獨攜破笠尋山寺，且喜貧交得酒徒。快意那能如百粵，止山去年早春端
粵遊甚壯合去三吳停舟先問靈巖路。鄧尉梅花天下無。

三月三日飲程弘執寓兼贈令兄在茲去疑

無端作客向茗谿，花下愁聞春鳥啼。賴有良朋相慰語，每逢佳節自含悽。賢兄好事情偏篤，襟日臨流手重攜。對酒不辭今夜醉，來朝風雨各東西。

清明日丹徒道中

日歸端在杏花時，又見桃花紅滿枝。尚想家園過寒食，

却嫌風雨故羈遲丹陽路北江關近白髮人慳與馬資
借問同舟爲客者茲辰誰不動鄉思

喜晤宋荔裳觀察四首

孤竹城南送客歸蒙將山繭製春衣方期列宿三台近
豈料嚴霜六月飛猿霍勢難通遠問鳳塵天遣脫危機
滄江白髮重相見痛飲狂歌定不違

子與荔裳別自永平戊戌迄丙午十

年矣

頻年憂患兩寅同

庚寅壬寅荔裳凡兩下獄

却訝詩文轉更工名世

那能兼厚祿著書元不諱奇窮况逢溫玉來吳下遂有

明珠入掌中

宋五十未育子至吳納姬逾年卽生

此事崢嶸良足慰從前

縲紲總成空

荔裳叠遭患難皆同室操戈事既昭雪詩文益工頃以所著安雅堂前後諸集屬子

評訂

握手相看涕淚滋故交應不比新知恠君多難髯猶黑
愧我長貧鬢已絲對酒飛揚如昨日登山矍鑠異當時
棲霞天闕南中勝努力追攀未許遲

往與荔裳于蕪湖
權關每同登眺步

復甚
健也

濱海山林豺虎多惡哉同姓又操戈丈夫豈必懷鄉土
仕宦尤宜慎網羅鶴市南頭好花月燕磯東畔少風波
此方卜築堪娛老買宅無錢奈若何

午日石埭姚六康明府招同諸子燕集各賦一詩

同集者粵東盧升卿王仁植黎次仲龔含五漢
陽李雲田會稽姜鐵夫慈谿周九逸烏程陳宗
彝上海陳鱣江青陽
孫儼若吾里姚彥昭

谿雨縣縣不住聲恰逢嘉節四山晴荒樓正擬羣公聚
綺席俄傳茂宰迎觴有蒲榴隨俗泛盤惟筍蕨見君清

平生故舊多仙侶誰似陵陽竇子明

題寓樓壁

將衰筋力厭樓居却喜茲樓曠有餘檻外雲峯宛圖畫
門前歌唱總樵漁青谿雨過空看水白日窗明好著書
只是山廚愁旅食主人貧儉客何如

青陽訪甯山同不值

小別俄驚十二年相思惟有尺書傳特來九子求良晤
豈料孤雲又各天我到江城尚畱滯君歸山館勿遷延
此番若不舒離抱向後佳期更杳然

秋浦立秋喜吳山賓見過

酷暑經旬戶未窺兼之跣足病瘡痍從僧看曆知秋近
厭客敲門獨爾空裏出高文箋石鼓瓢傾濁酒潤詩脾

來朝相約青谿去勝事先尋白筇坡

大白有秋浦白筇坡詩

送孫臥公歸里

秋浦逢秋返舊谿琴書以外不多攜爲憐巧語謀鸚鵡
更愛長年養鹿麕才似禰衡休浪擲山如李渤合幽棲
祇愁林壑難容汝仍想天街逐馬蹏

六月廿六日爲內人四十初度寄之

自爾歸予便食貧不辭麻枲佐松筠年年作客輕離別
事事持家多苦辛二女雖然娛老眼一兒還想繼吟身
莫言小姓求人種畢竟藍田玉足珍

七夕喜寧山同至

九華山下訪君廬君去蕪陰兩月餘寄語還家到池口
果然命駕及秋初蕭騷容髻都非昔激楚詩歌迥自如

欲話離情惟有酒豈應空曬郝隆書

贈石開上人

善慶庵故劉徵君讀書處梅
花甚多爲兵所伐今施作庵

梅花書屋想徵君梧竹交柯似碧雲悍卒摧殘何太虐
老僧培植不辭勤炎歊謝客偏畱我緇素能詩更出羣
淪茗焚香常夜坐絺衣蘿月白紛紛

王郇雨少府見過謝之

百牙山後小庵孤竹樹陰濃暑氣無客借僧房同結夏
蔭分邦伯宛棲梧忽聞車蓋來荒徑乍覩風儀識壯圖
四海蒼生望霖雨豈應佐郡獨沾濡

陳碧涵學博招飲有贈

鱸口停舟暑未殘城中何處得林巒荒園稍喜鄰文廟
芳徑時來問講壇好客故爲河朔飲張筵不似腐儒餐

北窗古樹高千尺坐久能令六月寒

送從子處厚返潯山兼寄令岳陳襄雲

天柱高人汝婦翁幽棲真有上皇風得爲佳壻身何幸
況是孤兒命正窮祗合相依如父子無緣長住各西東
殷勤寄語龍河壩明歲重來訪桂叢

魯江訪胡逸菴不遇因補悼亡之作

不到于湖十六年今秋重泊過江船故人遠出柴門閉
健婦新亡總帳懸治具倉皇煩令子遺懷曠達讓前賢
君雖半百猶青鬢可許花枝笑獨眠

吳素夫六十初度

君際滄桑未四旬甘辭榮祿慕遺民逐禽那及棋枰樂
桐馬何如茗盃新粟里有詩惟紀晉桃源無路可通秦

翁年耄耄兒才智豈獨高人又福人

卜仲璿移居

舊居桃葉渡西偏爾我爲鄰五六年別去城南非遠甚
重來巷北更懽然琴書有暇頻相訪酒脯能賒不計錢
況是兩家綦綯熟花時閒步短籬邊

歷陽畱別龍天士

江縣重過不似初得逢之子興蕭疎西窗月冷爭浮蟻
南國霜晴看打魚歲暮獨憐吾欲別官遷亦恐客難居
相期春暖來姑甌白紵青山信所如

同瞿中峽飲王左車宅

隔江風雪去還來甥舅同舟笑口開
左車之子中峽之甥也時同往江浦
況有香醪足斟酌兼之良友得追陪西窗剪燭聊深

坐南浦歸帆且漫催不記去冬長水客楞嚴寺裏撥寒灰

臘雪吟

江東今歲苦蝗蝻蘆葉禾苗總不堪正畏催租如猛虎
更愁遺種似春蠶連朝大雪驅除盡四野嚴寒凍餓甘
我有高樓供遠眺典衣聊復取微酣

丁未除夕喜顧云美曾止山見過守歲

青谿溪處艸堂開榆柳逢春淑氣回遂有故人千里至
不辭除夜一燈來閒身且寄隣僧榻快意唯憑濁酒杯
却望蔣山雲物變野夫白首重興哀

戊申元旦蘇州顧云美嘉興朱子祿贛州曾止山

紹興吳平露同集哺雛軒分賦

以下戊申年作

我所懷人各一方今春何幸得同堂虎丘公讌年猶少

崇禎辛未與云美社集虎丘今三十七年矣

鴛水重遊鬢已蒼

子孫亦三十

至嘉興盤桓兩月

塞出盧龍成舊雨

戊戌與平露相遇永平路近至白門往來甚密

分茗雪感新霜

止山亦二十年之交去秋同客吳興止山先去

萍踪會合非容

易日日相過醉不妨

虎踞關訪半千新居有贈

移居不喜近長干俗客來多應接難路出清涼臺更遠
宅如書畫舫猶寬梅花竹葉充庭際萬壑千峯繞筆端
只是吾徒太寥廓新詩吟罷與誰看

爲顧云美六十壽

年少相逢古劍池亭亭玉樹吐華滋那堪甲子須臾過
偏在乾坤板蕩時老人舊京歌黍稷冷棲荒剝近茅茨

莫言後輩無知已爭誦先生六十詩

旅食僧廚不自供蕭然瓢笠與孤筇周秦繆篆人爭乞
韓蔡分書衆所宗靈谷援梅尋斲碣生綃畫鶴上高松
雖云戶小難勝酒初度無能買一甕平聲

得錢湘靈書却寄

聞君長夏病侵陵幾欲過從恨未能久雨泥途難著屐
炎天火日畏擔簦相思空有三秋詠同老何堪百慮增
忽捧來書身已健懽如赤脚踏層冰

鄧元昭太史招飲中林堂因訪前輩市隱園詩予
有六卷遂舉以贈并係長句

秋澗爲園淮水東三吳名士聚其中

顧華玉文徵仲王元美王雅宜諸公

詩皆有

年來易主真成俗此日開顏合在公芳樹淥波生

氣色青尊白髮想流風吾家舊有羣賢什相贈還期好事同

三藏殿避暑題七淨師壁

長夏城居熱不堪更愁俗客每停驂山僧舊識房容借
竹院新涼睡易酣肺病食蔬元有益心清下筆頗無慚
詩逋文債俱完却持與鄰翁共笑譚

時唐祖命徐子能張葛民皆在寺寓

紀災

戊申六月多災異太白光芒與日爭

是年夏太白晝見者四十日晝地

動似舟行巨浪

六月十七夜地大震民舍多傾

雨翻如瀑下層城

二十

地又動大風雨平地水深三尺水波乍湧蛟龍怒墻屋皆頽鷄犬驚憂

亂惟思入林豁山中何處有柴荆

立秋後二日王望如明府招飲卽事

傲吏將之嶺海官預愁炎暑歷巔岼新秋漸爽車當發
老友頻過興未闌但對酒杯空笑樂漫言時事總艱難
如君十七年科目尚屈絃歌亦可歎

月夜過吳平露寓樓小飲限韻

莫春歸渡浙江潮徂暑重來白下橋自有閒心似冰雪
何妨假館近塵囂樓頭好景書千卷雨後新涼酒一瓢
恰喜老夫乘月至狂吟差不負今宵

重晤黃仙裳因造酒家小飲懷舊有作

江關爲別正黃昏堅約明年過白門及至草堂余又出
見懷詩句爾猶存秋溪何幸來雙槳野店相期倒一尊
聞說曾澆亡友墓萬松溪處獨傷覓

顧與治葬後惟仙裳至墓所故云

題徐仲光荷山艸堂卷

嶺海歸來重歎嗟荷山溪處老煙霞漫言此地堪終隱
底事頻年不在家玩世且同華表鶴維舟先聽白門鴉
問君可是徐鴻客行見楊花變李花

荅林二史見訪之作

聞君秋到冶城山幾欲相過步履艱却枉高軒來委巷
更投佳句慰離顏江村飢餓髭全白邊塞馳驅鬢亦斑
獨惜連枝易顛顛下浮橋畔水潺潺

林從兄青仲居下浮橋今亡矣

鷺峯寺前閒步

此地舊爲江令宅如今俱是種園人水邊籬落數間屋
野外花枝八月春羊豆馬芹何歷亂雁紅雞絳亦鮮新
其中更覺秋葵好朵朵微黃似麴塵

藕豆一名羊眼豆旱芹一名馬芹具

送孔吉人遊宣城

孟夏馳驅來舊京
新秋又作宛谿行
敬亭山好孤雲在
疊嶂樓空片月明
未向河橋折楊柳
先攜酒脯過柴荆
歸時只恐余它往
送別江頭無限情

柬魏惟度

清涼臺畔鄭公祠
千古高風永在茲
密樹能畱長夏客
閒窗重訂列朝詩
殷璠元結人爭慕
陸放倪迂我自嗤
封非何堪供採掇
愧無瓊玖報相知

爲鈕翁六十壽

家近江東春水邊
秦淮夏屋又新遷
一生不涉波濤險
萬里爭輸食貨錢
蘭秀菊芳多樂事
童顏鶴髮宛神仙
逍遙游復能齊物
身在南華第幾篇

中秋日支山上人林二史黃僊裳曹无咎沈方鄴

同集艸堂限懷字

客中見月應多感況是秋風更愴懷載酒何勞出山郭

仙裳欲攜酒譚詩聊以就茅齋風塵奔走年俱老瓢

歸休願未諧且與良朋醉今夕江颿明發各天涯

時二史將

歸闌仙裳將歸却方鄴將游粵余亦有石埭之行

九日飲邢命石水閣有感

野塘秋水浸籬根欺我黃花無一存猶有寒蔬生廢圃
不堪衰柳映衡門沿谿偶過良朋寓把酒閒將舊事論
昨日紅顏今白首每逢嘉節暗聲吞

贈趙伯良孝廉

伯良別號頑蘇廣東新會縣人

頑蘇本是宋王孫千古崖山一綫存每到臨安先隕涕

重來建業亦傷魂囊詩但就遺民語看劍難忘國士恩
更有同心俞籀石幾時朋酒醉荒邨籀石爲伯良好友是時亦在江寧

送西園雪坡二衲游天目

是夜同宿普惠寺

莫愁湖上霜寒夜孫楚樓邊葉落時二子言尋天目路
千峰獨禮玉林師時玉林師隱居天目殷勤參學惟聞道閒暇看

山不廢詩雲雀雙飛隨所適定于何處覓禪枝

寄祁門何令

晴冬客過石門山南望琴堂咫尺間幾欲看花來作賦
却憐飛鳥倦思還尊罍曾泛河亭月冰雪如親仙令顏
暫借雙鳬傳錦字可無芳訊及江關

贈趙子正

子正工八分書乃爲營將防黠故惜之

歲暮來游石墨山聞君風雅意相關祇緣人郡交何晚

龔山續集

卷四七言律

三六

纔得持杯我又還書擅八分能瘦硬學從二篆亦溪澗
斯人位置宜天祿豈合理名絳灌間

初春送屈翁山返番禺

以下已酉年作

歲晏君從絕塞歸遠攜新婦覲庭闈梅花開日催征櫂
荔子香時著舞衣私念炎方多戰壘每懷白下隱漁磯
明春倘奉高堂至卜宅牆東願不違

再送翁山

詩名輪爾擅東南爾却推予予自慙千里外猶勞遠信
一燈前始盡淡譚心縣寸艸歸難緩雪凍柔條折不堪
知有故人爲傲吏陵陽丹溜必須挾

同屈翁山飲周雨郇齋畱宿

周生買宅傍城隅中有方塘似鑑湖新築長隄種楊柳

重開精舍面菰蒲稱詩雅與騷人合索酒因偕野老俱
春雨淒寒歸不得紙窗吟榻共氍毹

兄子邵邨五十

十年多難走風塵此日還家樂事真亭沼重開將壽母
塢簷合奏燕嘉賓夢回紫塞山川險興發青谿艸樹新
併入王維詩畫裏流傳人代亦千春

送林二史歸莆田

薄宦迢遙出雁門所期祿養逮親存那知風木翻多恨
欲返鄉關豈易言身繫十年容鬢改手扶三櫬淚聲吞
貧交無物堪持贈送別江頭亦斷魂

送葉亨立歸漳州兼懷令叔伯俞先生

三月桃花雪正寒江亭送客意辛酸情知湖上游當壯

想到閩中春已殘家有高人眠土室吾將尺素寄漁竿
明年初夏同來此把酒論詩覺更懽

三月十九日作

野老難忘故國恩年年慟哭向江門南徐郭外三停櫂
北固山頭獨愴冤

乙酉丙午已酉三
年三月俱在京口

流水滔滔何日返

遺民落落幾人存錢生未死重相見雙袖龍鍾盡血痕

是日遇錢
馭少故云

吳伯成明府招同秦畱仙太史周子叔顧脩遠徐

原一龔介翁孝廉黃漢臣高士嚴蓀友徐安士

顧天石馬雲翎茂才社集限韻次日伯成去吳

門子亦歸矣

相逢恨不數年前每過梁谿興勃然今夜始霑仙令酒

來朝又泛洞庭船羣公咸集成高會孤櫂難停是別筵
碧澗青峯芳艸合榜人回首重流連

三月晦日秦畱仙太史招同諸子讌集有贈

欲揆名園入惠山連朝風雨阻躋攀天香閣上書千卷

金匱墩前水一灣

大香閣金匱墩皆畱仙所居

行酒賦詩羣彥集落

花飛絮寸心閒獨憐白髮逢春暮坐到鷄鳴且未還

贈別崑山徐原一

九龍山下柳如絲正是河橋送別時老我風塵無所遇

感君意氣獨相知連宵拚醉賢人酒他日還吟國雅詩

原一詩刻國雅集中

江上煙波殊未遠常將著作寄茅茨

爲鄭母七十壽

其子允吉樸龔兄弟皆與子善

東園小築結比鄰歲久方知孝友真旦必舞衣娛壽母

龔山續集

卷四 七言律

三

老猶剗薦待聞人生資萬卷術何慎酒泛千鍾家不貧
色養漫勞誇五鼎輸君魚笋及時新

送錢湘霽北游時予亦將之楚

蚤春卽擬去燕山仲夏猶然臥竹關
薊北風塵難作客江南花鳥且怡顏
稍能薄粥供朝夕何苦長途數往還
勸爾勿遊吾轉出蒼茫煙艇適荆蠻

將之皖口畱別吳畊方著作

長夏園居臥北窗那堪觸熱去風江
褰裳擬作沅湘客停櫂先經父母邦
老我征衫塵僕僕懷君寓閣水淙淙
司空山下逢仙令珍重爲傳鯉一雙

喜趙國子見訪卽別

鬱孤臺下歲將殘與爾言詩意甚懽
一公嶺南音寂寂

重遊薊北路漫漫停舟爲訪幽人宅開卷如翻大海瀾
正好追陪向林壑却愁予又別江干

古上菴喜七弟爾從至

同氣離居二十年何曾一夕對牀眠不圖江岸炎蒸日
却有山窗信宿緣露坐且酤榼市酒曉風又逐漢陽船
來朝把袂應難別重泛龍湖醉鹿田

白鹿山莊書懷兼示從孫有懷

山房曾共阿咸居一歲中完兩漢書本擬名成光史冊
那知世變老樵漁故鄉久別歸來晚芳徑重過感慨初
愛爾能承王父業荷衣應不羨簪裾

皖上訪程崑崙貳守

鐵甕城邊春水波使君高義獨差峩三年客過三停擢

一度花開一放歌復有棠陰移皖口時傳芳訊及巖阿
相思今始舒懷抱正好追隨奈別何

東陳襄雲兼寄豫字爾靖元的

年年相約會江樓底事蹉跎春復秋逐滯正當三伏日
飢驅未及萬山游石湖新月期君至塔寺涼颼散客愁
借問巖栖諸老友誰能高興亦同舟

贈蔣素書兼送其應舉白下

老我新從建業還聞君詞賦動江關停舟先訪城南路
開卷如登雨後山橘酒蘭香頻有贈琪花瓊樹定須攀
他年吾郡推風雅名在任張伯仲間

任克家
張子干

七夕飲成二鴻先生三劍閣

九龍山下大寒樓著舊端居百不憂底事江城猶買宅

溪知天地亦虛舟室中雲嶺千重出枕畔香醪盡日浮
梧井陰濃容避暑況逢佳節又新秋

龔山續集

皖桐方文爾止著

壻繡水王槩安節訂

五言排律

問旭上人三十初度

以下癸卯年作

南國多才士名家得幾人顧翁書入聖朱老畫通神二
妙專前美惟公繼後塵上人字學顧與治聰明應獨絕
筆墨遂兼臻雖在喧囂寺偏于冷淡親垢氛渾不染修
潔果無倫頃者年方壯居然學已醇虛懷加黽勉老氣
更嶙峋况復攻詩律從茲悟佛因若全如滿壽必與巨
然鄰玉塵王夷甫金龜賀季真宰官非不善終愧比丘
身

七夕書懷

長夏熱無比交秋氣稍平涼風吹戶牖細雨溼柴荆况
是雙星節能令四體輕中庭容偃仰北斗正崢嶸河漢
水方淺關山月未盈杯盤風俗舊兒女笑言清乞巧心
何切穿針眼倍明爾曹焉用此吾拙自天生抱甕安窮
老乘槎憶遠征去年今夜酒薄醉廣陵城

次韻題吳不官詩卷

昔有論詩者如叅大小禪圓通由妙悟積案在多年豈
許空疎輩能耕鹵莽田吳生家震澤逸興寓林泉恥作
鍾譚語全師葛顧篇不官洞庭東山人葛震甫往以詩
鳴其間不官猶及事之并師事顧
與視身同老衲於世總浮煙湖海憑孤往胸懷自廓然
白頭歸故里丹竈慕前賢茅宇堪休息藤牀合醉眠奈
何霜雪裏又上過江船

飲朱四均園中漫成二十韻

何處堪休夏城南半水園當年名市隱嘉客若雲屯秋

澗開東閣

姚秋澗初開此園名最著

弇州稅北轅

王弇州曾居此有記

其餘焦

顧輩

焦弱侯顧鄰初詩亦多

不憚往來煩易世主人換空庭喬木

存春秋希譙賞冷落類江村幸有朱公子來遊白下門

阿翁官憲臬買宅得丘樊文筆本森秀虛衷更討論性

情詩最捷師友義尤敦此日除芳徑相招坐竹軒菱荷

香氣遠槐柳綠陰繁高棟全無暑崇朝直至昏野航浮

沼面涼几列雲根茗果隨時供壺觴弗強吞問途親老

馬舒采奮雛鷄加以沈酣力當爲墀坵尊佇看園復盛

莫訝客長喧子昔曾題句君今尚詠言可知懷抱合風

雅許重騫

魚龍洞紀遊二十六韻

石堞沈師鴻沈十州遊同姚彥昭共游各有作書之

石壁

正想魚龍勝無從得主人逢君兄弟好贈我詠言新偶
爾商遊事欣然往問津涼風初過雨沙路不生塵未覺
谿行遠來尋洞口春小舸穿竇穴列炬照嶙峋海島層
層似鮫宮面面真奇花多茜茜古木盡松筠鐘鼓皆成
響鯨鯢亦聳鱗仙翁睂目具老鶴羽毛馴最妙娑羅樹
全遮金粟身水簾飛蝙蝠石澗立麒麟平坦高坡上依
稀淺渚濱方臺容客坐冷飲不妨醇野興重更燭清謳
一啟脣祇疑聽仙樂奚止避狂秦往路仍淡遠舟師怯
鬼神石門誰敢入險地不須臻舴艋催迴去蛟螭恐怒
噴順流休蕩槳急瀨可垂緡冥黑如過夜熹微漸及晨

茲遊嘆奇絕前此更無倫理策歸村店褫衣臥草茵山
家還送酒爛醉莫辭頻四美元難遘孤懷豈易陳惟應
卜居此長與爾爲鄰

胡君渥先生七十壽

以下戊申年作

國初勛與戚富貴亦多人及至滄桑後何無社稷臣開
平猶有喬蒼谷獨潛身餘子皆庸錄孤高誰比倫多君
兄弟好奕世王家親不忍趙王服寧甘嚴子緡葺茅先
隴側種菜大河濱破帽隨禪侶方袍遠俗塵言詞常激
烈膽氣特輪囷自命誠千古安驅至七旬前年兄介壽
今歲弟同春鄉里稱人瑞吾徒重逸民畫松雙幹老釀
黍一栢新勿問今何代惟知醉此辰尋常福祿語對爾
不堪陳

龔山續集

皖桐方文爾止著

壻繡水王槩安節訂

五言絕句

青溪歎

白下青溪路，倡樓楊柳枝。
可憐生此日，不見盛明時。

白髮歎

老夫年五十，白髮猶未生。
何事三年內，千莖復萬莖。

春日漫興

莫種章臺柳，長條空復情。
何曾繫郎馬，只是送人行。

暑夜聞歌

涼風吹夕渚，明月漾秋波。
不見采蓮女，但聞采蓮歌。

秋花雜詠

以下戊申年作

龔山續集

卷五 五言絕句

秋夜風雨環堵皆傾而秋花無恙予顧而樂之
忘其貧窶也各賦一詩

秋蘭

寧作幽人佩羞稱王者香眼中看不厭吾鼻轉相忘

秋葵

紅紫皆俗花鵝黃獨風韻亦有向陽心今人復誰問

秋海棠

春華吾不喜冷豔獨推君秀色嬌娥似微香靜者聞

茉莉

花向夜分開蕊自初昏摘山妻插滿頭香亦被牀簪

玉簪

玉簪時不尙何況玉簪花自向牆陰老休教樹葉遮

鷄冠

絳幘人已非
翰音猶未改
花雖無鳥聲
其意亦有待
雁來紅

莫漫誇霜葉
先霜葉已紅
天邊聞塞雁
根下響秋蟲

金山續集

皖桐方文爾止著

壻繡水王槩安節訂

七言絕句

和丘季貞燈夕詩

以下壬寅年作

月明曾聽廣陵簫
別後相思淮水遙
七字吟成腸欲斷
人間從此廢元宵

落馬湖

落馬湖邊蘆荻秋
白波無岸榜人愁
何期天與東風便
三日揚帆到濟州

中秋泊夏鎮

乍寒無客不思家
況是中秋見月華
且買村醪自斟酌
莫因羈旅重咨嗟

明月青溪一草堂幽蘭叢桂藥爭香
主人何事貪爲客
昨歲潯陽今汶陽

題樊會公小像

以下癸卯年作

此是樊生廿載前風標巾舄似神仙
如今漸老容非昔
破屋埋頭野寺邊
繪事江東有八家
君工人物更修姱
奈何不把青銅鏡
自寫真形對雨花

買花

三日春陰一日晴街頭忽聽賣花聲
紛紛桃李渾閒事
楊柳梧桐最有情

與天寄上人感舊

三十年前此讀書見公總角出家初
如今重到回光寺

公已二毛何況予

狹斜門巷舊逶迤化作荒園長兔葵惟有禪林終不改

佛前仍點舊琉璃

同光寺在舊院後故云

贈歌者韻郎

二月江南草樹芳鶯歌一曲斷人腸牡丹亭畔梅花下

何處重尋杜麗娘

西秦才子客東吳蕭寺過從興不孤豫恐春殘欲分手

倩人先作掃花圖

謝仲美爲王無與作掃花圖貌郎于其側

竹林寺

竹裏高樓遠見江山僧白日臥西窓惟愁松鼠偷新笋
時向東籬自擊桺

午日楊靜山太史招看龍舟因出北門看竹

片片龍舟下急湍水邊觀者萬人歡老夫別有怡情處
嘉樹園中竹萬竿

贈錢二郎

牧齋先生之孫也先生
屬予字之字曰霸先

錢郎十歲五經通鄉里皆知是聖童自合玉堂繩祖武
不應金鏡被塵蒙

松圓詩老擅風騷乃祖推尊義更高我有遺烟剛四笏

殷勤贈爾助揮毫

松圓詩老程孟陽也手製
墨極佳予以四笏贈二郎

吳越稱王志未中耳孫英絕悟前因霸先字汝非無意

莫忘髫年取字人

錢乃吳越王
鏐之後故云

贈滕鍊師

仙觀仍從大宋開道衣不學至元裁問君可是林靈素
曾見奎星奏事來

紅豆詩

有小序

虞山之東三十里有芙蓉莊乃牧齋先生讀書處也莊前紅豆樹一株高數丈圍數尺枝葉蒼翠不花者二十年矣辛丑三月忽開花是年九月爲先生八十初度枝頭又結一子似特爲先生壽者先生暨諸同志各爲詩以張之踰年癸卯予至虞山聞其事亦補八首

秋來紅豆生南國
恰遇仙翁大耋時
樂府重翻新製曲
莫教仍唱右丞詩

花似揚州玉蕊開
實如南海紺珠來
祇因五百年前樹
曾作君家錦綉堆

猶記朱櫻出上闌
寢園薦罷賜千官
誰將一粒相思子

依舊雙擎赤玉盤

狂風吹屋捲衡茅一點腥紅綴樹梢莫是天公有淡意
萬年枝上藥重苞

天寶開元迹已陳閒思往事淚沾巾秋風南國吹禾黍
愁殺當筵唱曲人

荆棘銅駝絕可憐江村瑤樹尚依然從今逆數花開日
正是崇禎十七年

二十年來始一花
花開結子類丹砂憑誰記曲屏風後
自有仙人萼綠華

君家遠祖年八百應見枝頭四十紅八十老人凡四見
再回便是百齡翁

夜泊

風吹湖面菱荷香
夜泊橋頭枕簟涼
天與詩人送詩料
一鉤殘月挂垂楊

丹陽

江行無奈逆風何
上岸驢羣不受馱
欲覓肩輿資斧少
丹陽郭外跨青騾

晝寢

休夏無如睡味長
却嫌人事苦相妨
今朝雨氣能迴客
竟日齁聲欲撼牀

夜坐

晝長夜短惜勞生
早晚貪眠差可平
江雨過門山月出
池邊露坐又三更

煮瓠

曉出柴扉雨氣新
家園瓜果驟輪囷
摘來爛煮如蒸鴨
熊掌駝峰未足珍

贈老僧

山陰人自言少時爲毛帥健兒

韎韐曾從遼海軍
袈裟歸臥剡溪雲
可憐射虎屠蛟手
今日揮蠅與拍蚊

題倪閣公近稿

詩篇直出元和上
書法全從淳化來
與治不生于一死
眼前誰似爾通才

題葉九來小像

石上松濤雜礫聲
睂間喜動是詩成
世人但道金門好
驃騎何如第五名

九來之兄諱庵方在館閣

龍江關雨泊

平生睡美向舟中況是秋江雨滴蓬久客自諳行路法
閒身不恨石尤風

廣陵一貴家讌客伶人呈劇目首坐者點萬年歡
予大呼曰不可豈有使祖宗立於堂下而我輩
坐觀者乎主人重違客意予卽奮袖而起曰吾
寧先去留此一綫於天地間王貽上拊几曰壯
哉遺民也遂改他劇

黍離麥秀尚消魂何況威儀儼至尊莫道人心盡漸滅
也留一綫在乾坤

雖然游戲事非真優孟衣冠亦感人却訝先朝曾扮此
當筵未見有人嗔

客至

山家酒熟不須酤况有瓜疇與芋區爭道主人貧好客
誰知囊底一錢無

上元月蝕爲雲所隱

以下甲辰年作

他鄉又見歲華新元夕偏傷客子神若對月明愁轉劇
不如無月免愁人
頻年日食不爲災月食何妨閨又來獨憐今夜雲遮却
依舊團圓十二回

牛首山密公房

兜率崖前萬樹松文殊洞口一聲鐘雨窓睡起憑欄立
疑是匡廬五老峰

題王元倬先生小像

神廟遺民世所稀斯人髣髴漢官威可憐諸葛真名士

竟作南陽老布衣

題張則之小像

二十年前曾識君風流文采冠人羣如今勲業窺明鏡
獨坐蒲團禮白雲
茗溪作客夏偏長每食無餘亦可傷幸有故人來慰藉
佛前私語詎能忘

秋艇將遊明聖湖自慚囊底一錢無窮魚敢望西江水
百斛能令渴者蘇

二十年前患難交知君雅意未全拋獨憐咫尺同千里
筮得雲雷第五爻

莫言托鉢是閒身到此棲遲已六旬明日我當歸故國
昔年君亦作遊人

東王汾仲

草閣藤牀竹火爐三冬月俸仰生徒故人有疾憑君養
古道如今久已無

雪後懷林茂之先生

凍雪初晴鳥躡毛閒攜幼女出林臯家人莫道兒衣薄
八十五翁猶緼袍

溪行遇牛首僧

雪後柴門暴背時起行溪畔看流澌山僧相見私相語
此老胸中無數詩

杜湘草有蘆笛製甚工其聲亦異爲贈此詩

截蘆爲笛世應無吹氣如蘭爾獨殊但遇知音桓子野
不愁入破李君謩

題友人蛺蝶圖

學畫無如畫蝶難
蝶身文采百千般
花間撲取生蝴蝶
夾在書中仔細看

題張大風畫四首

梅花開後杏花開
酒伴騎驢邨店來
不惜千錢沽一斗
當壚笑指玉山頽

漁翁小艇繫槎枒
楊柳陰中賣酒家
取醉北窗消永日
階庭況有石榴花

亂山淡處白雲屯
幾箇人家晝掩門
野老杖藜時一出
蕭蕭黃葉滿前邨

萬壑千峰一雪埋
山家羣樹總枯柴
早梅獨綻寒崖下
踏破閒僧舊草鞋

霜月

曉啟柴扉霜似雪
夜歸蓬徑月如霜
老夫不畏寒侵骨
貪看霜天明月光

荅王左車父子以詩見寄

羣公騎馬朝回日
大賈停船貨殖時
爭上似王家三父子
雪窗鏗火共吟詩

半嶺庵看花戲題其壁

以下乙巳年作

石頭城裏花無數
絕艷誰如半嶺菴
一座錦山堆院落
三春麗日占江南

梅蕊蘭英雖可愛
嬌紅終遜海棠花
白公有句非輕薄
惱得山僧悔出家

同龔半千訪掃葉上人

乍覩丰姿山澤臞徐看題詠雪霜鋪不知付拂開堂者
曾道斯人半句無

二月十二日作

老至貪杯不厭頻况逢桃李鬪芳春今朝病酒難重醉
孤負百花初度辰

又題王貽上看花圖

水部梅花事已非法曹吟閣尚依稀新年聞說蕃釐觀
芍藥重開金帶圍

祖堂訪石谿師不遇

冬春相約訪山扉風雨蹉跎心事違今日我來公又出
短垣修竹映斜暉

題吳子班一草亭冊

燕雀湖邊風雨冥黃扉碧瓦總飄零如何秋浦淡山裏
尚剩乾坤一草亭

浩氣爲雲入太虛傳家祇有數行書竹籬茅舍堪棲隱
絕勝蘭臺芸閣居

題姚伯輔小像

仙居山下呂徽之米桶盛妻凍不辭今日姚生重隱處
高風寧復異當時

題江天際畫

平山堂下遇江生曾寫雲峰送我行今日重來已陳迹
紅橋秋柳不勝情

憶予十歲時初學爲詩清明日隨塾師出郭至丁

翁家有絳桃綠梅二本翁言手自種果三四年

便開花師因命予作絕句予應聲云云翁大喜
爲書屏間今四十餘載翁之子某過予話舊因
誦前詩附錄

龍眠山下野人家一片寒香覆白沙聞說當年種梅子
如今梅子復梅花

龍眠山下野人家一簇繁英似赤霞聞說當年種桃子
如今桃子復桃花

題汪西京像卷

以下丙午年作

若翁殉難廣陵城義烈能齊史相名賢子豈容通仕籍
風篁雪澗了餘生

邗上遇沈方鄴卽送其歸宛

蕪城相遇太匆匆却喜歌筵此暫同歌罷出門天色曙

渡頭雙艇各西東

垂垂新柳裊江關
愁殺行人不共攀
最是難忘舊游處
孤雲衆鳥敬亭山

潤州卽事

高閣平臨鐵甕城
城頭朝夕海螺鳴
聲聲淒切已如此
况復笳聲與角聲

與諸公遊鶴林寺飲米元章墓柏下

載酒尋芳去復來
南宮祠墓獨徘徊
無花亦合醉於此
况有櫻桃千樹開

鶴林寺懷古

青春重到鶴林寺
白首長吟李涉詩
竹院閒猶似當日
逢僧話亦不多時

唐李涉至此有竹院逢僧之句

黃鶴山頭黃鶴棲杜鵑花下杜鵑啼仙蹤一去無消息

只有僧樓面舊谿唐殷七七令杜鵑九日開花今有杜鵑樓

元章死葬此山根誓作伽藍護法門游客到來皆酹酒

何須上塚定兒孫宋米芾有墓在寺前芾嘗發願為鶴林寺伽藍後果然

馬素塏前多古松相傳此老是禪宗卽如同氣連枝句

已作人間夜半鐘宋禪師馬素葬此其詩云一回相見一回老能得幾時爲弟兄

八公巖題一微上人壁

石澗涓涓聽不窮況多竹韻與松風山頭亦有淮南桂

無復仙人似八公

焦山絕頂

百尺高樓四面江山僧終日坐晴窗客來何物供茶具

指點園丁摘露瓊本草紅豆名降瓊

中冷泉

百排山下有三澗惟有中澗著水經可惜江波沒泉眼
非時那得注銅鉞

卽事贈周建西子常

月華山畔雨蕭蕭賴爾勤過破寂寥貧士那能長得酒
花村茶舍日相邀

牙落

鏡裏容衰甚不平酒邊牙落更堪驚也知髮白難重黑
敢望他年兒齒生

山木逢秋葉自辭篋中何用強收之封題尚記今年月
丙午常州立夏時

旅食歎

初夏將爲閩粵遊南薰恐不利行舟早知五月多陰雨
汲汲揚帆豈待秋

自愧饑驅來往頻祇因升斗困風塵女兒年少不知事
只道天無餓死人

門戶全憑健婦持朝朝簾下劈青絲織成衣帶輕如許
不斷炊煙幸在茲

本草相傳辟穀方麻仁黑豆最爲良良方豈必凶年試
大藥應從此日嘗

人世皆爲口腹營濁醪麤飯了吾生來朝米盡將何食
且把園蔬煮作羹

謾說青門五色瓜庾郎三韭亦豪華爛蒸去毛勿拗頸
充盤瓠子更堪誇

六月

六月重衾更著綿陰寒渾似莫秋天我生半百何曾見
記是康熙丙午年

題笠山師詩卷

雨窗閒靜聞公詩風格高寒繫我思彷彿當年無相寺

杖人同聽瀑泉時

笠公爲浪
杖人首座

夢與施愚山論詩醒而有作

我所懷人各一方惟君譚藝最難忘其中妙訣無多語
只有銷魂與斷腸

屏間題句

著書每日有功程客至能無輟筆迎笑語多時妨正業
樵蘇不爨豈人情

題郝羽吉振衣千仞圖

梧竹荒涼鳳鳥饑沙鷗汀鷺一羣飛誰知此老胸中異
千仞岡頭獨振衣

從弟旣平以詩草就正題此

愛汝文心秋水明近來詩律更多情卽如倒影中流句

一幅元人畫不成

旣平五日觀渡未句笑人爭向江頭立不惜全身影倒垂

過西華門

碧瓦曾無一片遺黃扉猶有舊時基河干野叟低頭立
知是周人咏黍離

題友人瘦馬圖

天寒遠放雁爲伴日暮不收烏啄瘡杜陵此句真淒絕
見爾沈吟亦自傷

桃花村戲答閻古古

桃花村口路三叉雙塚新阡司寇家只許桃花笑人耳
遊人誰敢笑桃花

雨中漫興

節近重陽多雨天荒厨似欲斷炊煙客中何物加餐飯
茭白蕪青幾箇錢

題鍾廣漢詩冊

惠我新詩見一班雄才麗藻動人顏他年漸老歸平淡
知在高岑伯仲間

題雨凡上人像

吟咏久無洪覺老丹青尚有巨然師空林抱膝知何事
正是經營慘澹時

法華寺古蹟

以下丁未年作

顏公千祿書全廢獨有山中四字存稍減神情因刻畫
不磨風格自高騫

蘇公作郡才三月山水間詩苦不多曾上此山觀震澤
僧寮猶有七言歌

寄懷葉子羽長興

名酒無如下箸多也曾霑醉不重過雙鳬何日來茗上
山月湖風雜棹歌

送曾止山登舟

日日河干買去舟知君未去不曾愁今朝解纜真成別
腸斷茗溪春水流

荅程弘執送葛粉

衰年病肺酒爲魔止酒其如愁思何多謝情人饋仙藥
解醒仍不廢微酖

羅鏡菴歸舟有巨魚躍入載至太湖放之乞詩

滿地江湖多釣船遊魚那得保重淵知君慈愛能生物
特地投身意可憐

李雲田乞姚氏女畫竹寄其室寶鐙并屬予爲題

小詩

楚客懷歸歸路難先將墨竹報平安君如粉籜隨風遠
妾似霜根抱石寒

陵陽山三絕句

是日蘇舜欽之招同王名仲
時與桂次白姚彥昭共遊

黃鶴池邊黃鶴去白龍潭上白龍飛遊人何處尋仙跡
只有丹臺與釣磯

竇公遺像居然在道院惟餘一跛僧不是蘇耽有仙骨
誰能領客上峻嶒

茗飲先烹石罈泉陵陽丹溜古來傳何當汲取三千斛
一洗今人滿腹羶

友人席上戲爲俳體

魚龍鷄鳳菜靈芝旅食將何饜菜頤猶喜山中豚肉賤

家家解作叔和醫

俗傳王叔和脉訣左心小腸肝膽腎右肺大腸脾胃命石埭請客強半是

肉故戲之

石埭紀遊十二首

各有序

猷州城○石埭在秦以前爲古猷州其城近陵陽

東麓隋唐間江東大亂衆推左難當爲山砦總
管據猷州城保障一方則唐時古城尚在今廢

矣基址周遭隱隱可見居民耕者常得古銅鐵云

陵陽山下稻花秋南陌東阡自一丘聞道沈沙多折戟
老農知是古猷州

陵陽山○秦始立郡縣茲邑爲陵陽以其近陵陽
山而得名也山在縣治之北一里外漢元封間
沛人竇子明作令於此嘗釣於澹谿得白魚似
龍剖其腹有方書子明喜曰此吾志也遂登茲
山結茅以居修煉如法三年丹成有白龍下降
負之而去

鸞鶴騫飛向碧空如何作吏入樊籠古人亦有同心者
梅福王喬與葛洪

丹泉○陵陽山之中峯有仙壇宮宮上一里有丹
臺丹竈卽子明修煉處陰晦之夜嘗見火光燭
天疑丹之餘輝也臺下有丹泉從石罅涓涓流
出雖大水旱不盈涸其味甘冽迥異他泉郭璞
遊仙詩云陵陽挹丹溜卽指此

丹竈千年尚有神子明而後夏無人天生丹溜誰來飲
飲者還推郭景純

舒谿○古名涎谿其義未詳東漢有舒氏三女從
其父采薪谿上忽見大桃自澗流出三女剖而
分食之俄傾坐化父奔告於家再來則三女冉
冉雲端矣遂改涎谿爲舒谿舊有舒姑廟在谿
上今尚存

一灣春水漾晴沙兩岸居人數十家谿上重尋仙女廟
門前依舊碧桃花

白龍潭○在舒谿之東一里許下有溪潭其色凝
碧礚石嵯然獨出潭上卽子明垂釣處也李太
白詩杜鵑花開春色闌人歸陵陽釣魚晚是時
石埭屬涇縣故太白此詩在涇縣東亭作

上下山谿俱涉灘惟餘此地獨溪寒其中或有龍孫在
無復仙人把釣竿

黃鶴池○在陵陽中峰之麓方廣一畝四時不涸
相傳子明之弟子安亦仙也曾騎黃鶴來訪其
兄暫棲於此故名李太白詩白龍降陵陽黃鶴
呼子安卽用此事或云子安葬於山下有黃鶴

巢其塚樹非也池上有黃鶴墩當因池得名俗稱白鶴墩亦非

黃鶴池邊黃鶴墩誰騎黃鶴下松根仙人一去無消息
只有羣鴉噪晚村

長林○在舒谿之東南一里古有長林街唐杜牧
守秋浦有妾程氏不爲其妻所容遣嫁於長林
杜筠甫六月而生子卽杜荀鶴也少攻詩舉景
福二年進士第世爲長林人不復歸京兆矣牧
之集有示阿宣詩云一子巍巍跨相門宣乎須
記若而人長林管領閒風月曾有佳兒屬杜筠
蓋阿宣牧之長子欲其知有此派在長林也
文采風流杜牧之桃花曾誤十年期桃根又屬他人手

稍喜還生姓杜兒

牧鴨湖。在縣西十五里之四都相傳荀鶴少時
寒微曾牧鴨於此故名

荀鶴詩名冠晚唐小時牧鴨意淒涼乘軒何不歸京兆
想是依依戀北堂

迴驢嶺。在牧鴨池之東一里相傳羅隱聞荀鶴
能詩騎驢訪之至嶺而遇荀鶴相與定交不復
至湖上故名

江東羅隱本豪賢却肯窮鄉訪少年可見詩人難再得
騎驢牧鴨總堪傳

魚龍洞。在縣西三十里之六都有魚龍山山下
有溪洞流水出焉遊人操小舟秉燭而入其上

爲石屋左右皆石巖千年石乳纍纍下垂有如
柱如屏如牀如水簾者有如鐘如鼓如磬者如
松如桂如荔支如娑羅樹者如鰲如鯨如馬如
鸚鵡者奇形怪狀酷似其真相傳其水發源於
青陽之梅宕山伏地行十餘里始出今且人行
三四里則有石坡石臺可以環坐飲酒前有石
門僅容小舫門內則峭壁深潭杳不可測遊者
懼不敢復入

古洞逶迤十里餘深潭疑有老龍居天工亦解兒童戲
幻出真形畫不如

轆轤石○在城南儀鳳門外危灘急流之處相傳
邑有賢人出則夜聞轆轤之聲以爲先兆宋丁

公黼王公鎡明李公廷璋吳公必顯畢公鏘蘇
公瓊桂公伸釋褐之年皆有此兆邑人於谿上
作輓轡亭歲賓興則祭之亭今廢而址猶存
危灘靜夜輓轡聲知有英賢此地生可惜世人勤禱祀
沾沾只是爲科名

三埭石○在縣西一百六十里之十三都有三巨
石橫亘谿上以塞璉谿鴻谿之水曰上埭中埭
下埭中埭之石方廣五丈可坐百人三國時特
作石埭塲於此以屯鹽梁大同元年改爲石埭
縣自是不復名陵陽矣

縣名石埭義如何三石爲梁永不磨我欲往看愁路遠
居人老亦未曾過

九華道中

雲峰咫尺興飛騰炎暑攀躋恨未能
直待秋涼重命駕
吟身須躡最高層

題石開上人所藏無道人畫

秋浦曾來藥地禪爲公禿筆寫林泉
暫時不肯輕拋却
掛在松窗十二年

東龔仲震

時寓河房與吳庭發隣

青谿僑寓已三遷垂橐仍無買酒錢
幸有吳郎共晨夕
閒看秋水過霜天

送行脚僧

開堂付拂渾無賴不借軍持自有情
極目江天路空濶
方知孤鶴是前生

念山續集

上巳東王左車

以下戊申年作

莫愁湖上水初平
孫楚樓邊草漸生
幾欲出城修禊事
却嫌風雨太無情

哭胡吉甫先生

行年八十八春秋於世脩然無一憂
獨惜白頭逢喪亂
忝離麥秀不勝愁

三藏菴見陳百史遺墨有感

驀見僧房大幅懸
回思三十五年前
斯人雅志千秋事

僅僅科名亦可憐

崇禎癸酉予與百史結盟此菴故云

張玉書橫潭冊子

聞說橫潭別業存
桃花流水自成村
明年倘發西泠櫂
定欲停舟扣爾門

題徐子能小像

何幸同生壬子年苦吟端不讓前賢

子與子能皆壬子生前賢柴桑少陵

香山亦壬子生

獨子鬚白君鬚黑才命雌雄已判然

題畫寄桃源令魏公

淮河交處少山林花縣新彈宓子琴爲寄郭熙圖一幅
千巖萬壑助琴心

贈汪少室四絕句

櫻桃時節雨偏多陋巷柴扉客不過
倏有素冠亡友子
矯如白鶴下庭柯

絕世聰明管輅年懷中詩草更翩翩
自言酷好龔山老
衝口能吟數十篇

爾祖司農受國恩先朝廟諱合知尊
如何輕犯
光宗

諱想是髫年未討論

嵩高三十六峰齊太室居東少室西汝字重更應取此

白頭猶記在青谿

少室名嵩舊字洛公子以其犯廟諱也爲改今字

訪王子言秘書畱飲竟日有贈

朱雀橋邊谿水平畫船簫鼓雜歌聲不知何處金閨客
高咏臨流聽者驚

曾去天都陟翠微重來京國玩芳菲眼前冠蓋應無數
獨念僉山老布衣

野夫白首臥江村懶慢經年未出門今日杖藜來水閣
懽然談藝到黃昏

題高翁小像

家在秦淮水閣居蘭花蓮葉滿堦除捲簾時看人垂釣

欹枕夜聽兒讀書

贈江天章

傳神自昔推曾老波妙手如今讓戴生設復有江郎工此技三人異代合齊名

趙山子齋頭看沈石田畫

質蹟無非沈石田此圖山水是真傳主人欲售我欲買安得青銅三萬錢

重題採藥圖

白柄長鑱手自持花籃盛藥步行遲
眉端尚有英雄氣二十年前四十時

秋夜示內

竹院風聲吹破壁紙窗鐙影照空鐺
今宵愁絕應難寐

欲飲借卿頭上簪

汪我生家有婢肥白而眇年二十餘尚無偶一日
有眇丈夫見而悅之持厚幣取去予適逢吉期
戲爲俳體

昔有人眇一目妓翻嫌兩目是多餘情知今夜銀鐙下
合色真成比目魚

重陽後一日徐仲光送酒

斗酒雙鳬誰餉君君還餉我意殷勤獨憐不及重陽節
把盞同看谿上雲

偶過朱槐里齋頭因題其小像

論交三十二年前對酒吟詩壁尚縣我望六旬君望八
白頭相遇更歡然

破冊羅縑誰寫真品題俱是宋遺民傳之異代同心者
想見西臺慟哭人

爲張僧持五十初度

南邨五十負詩名詩似梅花徹骨清借問天街騎馬客
幾人能作苦吟聲

自小長齋繡佛前獨餘米汁未能捐城南四百八十寺
一寺畱君住一年

上河守風邂逅江天申懽如故舊邀飲江樓而張
南邨適至遂成大醉詩以紀之

小艇初維江岸沙忽逢年少有才華問予可是龔山老
不惜千錢付酒家

欲挂風帆恨石尤借君杯酒可忘憂無心又遇南邨子

爛醉旗亭卽勝遊

桃花潭懷古

太白常遊涇水濱交遊寧止一汪倫歸時獨爾來相送
千古令人思此人

題龔半千畫贈曹明府

龔生墨妙冠江東曾寫雲山艸閣中今日石門尋茂宰
林巒真與畫圖同

黟縣夜酌

石盂山下雪花飄旅舍將何破寂寥惟有城南雙料酒

一瓶差可度寒宵

黟縣所沽惟白酒
名雙料者頗佳

將之無錫別王壻安節

以下已酉年作

春風挂席向梁谿今夜維舟泊水西惜別漫勞畱我宿

榜人恐不待聞鷄

過弘濟寺不得上岸訪蒲菴師寄此

言登江岸訪蒲公却恨舟師趁好風纔得過江風又息
幾回搔首夕陽中

江上觀水勢因憶程孟陽有三月春愁水不如之
句遂用其語作起

三月春愁水不如眼看春水更愁予何年飽食無遊事
堅臥茅齋老著書

錢湘蘄屈翁山鄒訐士甯山同古白上人見過艸
堂小飲因至晏家橋看罌粟花得七絕句

長板橋頭春水波舞衣歌扇總消磨獨餘野圃閒花艸
勾引東風蛺蝶多

玫瑰芍藥本妖嬈，粟花開色更嬌。
古寺舊爲江令宅，小園今在晏家橋。

笑指城南富貴家，朱門寂寂鎖煙霞。
不如老圃多幽趣，常許閒人來看花。

艸堂臨水淨無塵，菜甲盈畦別有春。
閉戶不曾延俗客，看花時復過比鄰。

自歎貧家召客難，客來寧不薦杯盤。
典衣沽酒亦成醉，甜笋香芹未覺酸。

花落鶯啼春可憐，酒徒相遇發狂顛。
諸君莫笑予頭白，我是花中老少年。

水閣紛紛颺酒旗，山厨往往斷朝炊。
枝頭無數米囊子，戲語錢翁轉自悲。

胡君籲山人七十壽

腰鎌曾上爛柯山又逐成連海嶠還丹竈不嫌生白髮
緇塵未易改紅顏

陶母九十節壽詩

剉薦高風自古推未聞眉壽及期頤千秋重見陶家母
苦節遐齡覺更奇

跋龔山續集後

龔山先生余外舅也歿既二十一年槩始克檢鏤遺詩
實慚蹉跎歲月然蹉跎之故有難言者焉往宛陵愚山
施先生與蛟門汪子之爲舍人時曾以剗劂力請之北
平金公公力囑某盡謂北平顯官也某雄賈也得此兩
君全集唾手可成槩竊言念某旣無生平驩外舅外和
中介從不輕以知己許人詩若文何事而可委之於不
知己之人成之以謾曼奧渫之物加以生前所斷斷不
爲者而苟且爲之於身後祭非其人尚吐弗茹何況遺
帙遂寢弗舉時先君听然曰寢弗舉良是爾小子當自
勉勿借爲捕鳥罔也又東陶吳野人書來曰龔山遺集
久未流傳余當首率同人伙助夫槩固貧窶野人尤貧

竇于槩顧念野人素厚遇先外舅乙巳秋先外舅客邢
野人家濱海海水暴至廬舍蕩沒榻有病婦啼繞飢兒
野人猶戀戀郡城與汪仲子舟次黽勉扶持買舟相送
氣誼之篤用是深信弗疑時先君復听然曰信弗疑良
是爾小子當自勉可借爲驚馬策也野人旣數謀厥緒
弗就心殊鬱鬱旋亦溘逝而愚山蛟門兩公之卒又後
先相繼嗚呼此道茫茫無復過問者矣今年春槩臥疾
旬月重念先君隆言廼質衣減食竭蹶從事先梓壬寅
以訖巳酉之詩行將次舉全集是則遵其舊標曰龔山
續集續集成酌酒以告因及愚山蛟門野人之舉雖中
輟誼實可感附記之于後巳巳六月朔壻王槩拜手識

又跋

李太虛先生曰：龔山詩長於序事，是足櫟括先外舅全集。木厓潘子曰：先生詩陶冶性靈，流連物態，不屑屑爲章絺句繪，間有徑率之句，頗爲承學口實。然先生實苦吟，含咀宮商，日鍛月鍊，凡人所輕忽視之者，皆其嘔心刻臍而出之者也。又好改人詩，與人辯論，至面赤背汗，不少休人，亦以此賺之。而先生已語罷，輒忘不復省記矣。木厓之言尤中窾綮，槩憶先外舅往與楊子商賢論詩，未合，楊子奮衣出，然居僅隔垣也。楊子夜則升屋騎危，操刃詬訕，嗷嗷不止。及先外舅卒，楊子聞之，踉蹌奔至，以手俯面，頭觸地，慟哭失聲，曰：「自此老友中求一直道，不少迎合之人，不可得矣！」先外舅品誼詩歌於人始

雖齟齬卒能使其回心惛慮類如此木厓龍眠風雅之
選爲先外舅褒然採入數十百首用專一弓極相推重
吳廬宮詹與先外舅素稱石交最喜誦其詩致手錄遺
句延友經歲罄抄全集置之几案曰見此如對故友是
皆古人之誼不可以不記槩又識

方龔山先生傳

宿松朱書

紫麓

方文字爾止一名一耒字明農桐城人方氏世以忠孝節義名其家自四川斷事官法死靖難之禍數傳至學漸講學稱明善先生學漸生大鉉以進士仕戶部主事立氣節能文章卽文父也年五十生文文七歲父卒京邸其母王氏年二十餘苦節撫成之文年少有才名思振其家聲與諸名士貴池吳應箕輩及復社幾社諸君子相厚善崇禎十五年大荒乏食宣城令梁應奇以五百金贈之乙酉後輒放廢不自繩檢避兵吳江尋病困白下武進令張國樞高淳令崔淪奇濟其急旣而太湖令李世洽延爲生徒師遂徙家焉文爲人猥狹又任放好嫚罵刻意爲詩輒嫉憤舉世世無當其意者以故多

齟齬四人獨能終始禮之無間也間登廬山南望痛哭
還居樅陽會妻中風暴死妻家構釁移禍其妾坼妾腦
墮胎死時母年七十矣命文出遊繼室龔生子延宗祀
文依母不肯去母嚴命之乃之淮安已聞母卒奔還厝
之淺土事竣遊徐州入燕北探孤竹諸貴人多折節交
之文顧時時狂罵曰齟齬毋近牀汗我逾年復命棹歸
卜居淮上娶故殉難汪公偉女爲婦時李世洽觀察徐
州復往從之已乃南入杭州縱遊西湖還居金陵以醫
卜自活尋遊兗州謁曲阜林廟去之濟南上泰山西赴
廣平大名還金陵未幾泝江入豫章至贛州還有四遊
詩集壬寅益憤激若蹙蹙不能一日生者過清江浦讀
洪武所封河伯廟碑慨然酹酒呼謝處士緒吾與爾爲

後起不孤也痛哭去謝處士緒者宋會稽諸生居金龍山入元以忠憤自沉卽洪武所封河伯者也事詳廟碑文去復上泰山還客常州或出或居戊申謁孝陵先是文從兄孔炤爲南尚寶司攝太常寺秋祭攜文及其子以智同至齋宮夜有羣鹿來觸人項懸金牌鉸永樂字其上蓋成祖所放也取餅餌飮之卽馴擾攸伏雞鳴鼓鐘百官鵠立拜舞文因縱觀其盛心樂之遍陳禮樂器物復嘆其朴儉謂聖制不可及至此忽三十年都非往日見聞文曰戊申高皇帝登極之年也嗟乎哀哉伏地大哭不能起久乃去明年歿于蕪湖客舍有爲箕仙之術者或傳箕曰平生詩酒是生涯老死江干不憶家自入黃泉無所見冥官猶是舊烏紗遠近傳之以爲文也

文無子其壻安節王槩爲刻僊山詩若干卷僊山在懷遠縣城外周世宗望之謂濠州有王者氣文以自號不忘濠也

朱書曰吾聞之吳人汪摺曰陳溧陽以假歸乞僊山定其詩執禮甚恭僊山反復讀之曰甚善但須改三字卽必傳無疑耳陳以爲隱也曰寧止是顧三字者何也僊山厲聲曰但須改陳名夏三字時坐客滿舉錯睥不能出聲陳亦厲聲曰爾謂我不能殺爾耶適代巡來謁陳拂衣去客咸咎僊山僊山笑曰吾自辨頭來耳公等何憂頃之陳復入執僊山手涕流被面曰子責我良是獨不能諒我乎竟相好如初